

ሶቀማንቶ ጳውሎስ ዋኔ ሶህኑተ ቆሮንቶስ መረሃ ኣጉስ

ጳውሎስ ቆሮንቶስ መረሃ ከተቦ ዋኔ ሶህኑት ከተበንቶኢሁ ቆሮንቶሳን ዱእ ምኒ ኣዜን አመዕነት ሄእ አሌን ኬዕዮ ኦርሻተ ሂሬኖ ዋቃሃ ደግሲሰሃ ሰውዪኒት። ህከ ወክት ቆሮንቶስ ከተሙ ግሪክ ሀዕነረ ከተመ እህቶስ አበ አካይያ ዬኖ ሮም ባዲሃ ወኔሃ ከተመ እቅ። ሁኩ ከተሙ ሎሩ ንግዱ፥ አደዱ ሴሩ አልባዕሌቤቹሃ ሂሉ ኮፍአአኖ ጠው፥ አደደ ሀይማኖቲን ደገሞሃ ቤቹ እቅ።

ሶቀማንቶ በትሽ መገኑ ኡጩኖ ዱእ ምኒ ኣዜን ሄኦ አደደመተኔሃ፥ ሂላ ኮፍአአኖ ጠውተኔሃ፥ ዝነተ አዕለከ ጎጆሃ እህተኔሃ፥ አመዕናኖ ሴርተኔሃ፥ ጠሊላ አያን ኣሰቶተኔሃለከ ሬሆች ኬአተኔሃት እቅ፤ ህትን ሶቀማንቶ ተሸት ላገተ ከን ጠዕምቶ አሌን አዕይ አገዕሪን ሆንጠህሰኖ።

«ኢተቀሙ» መገኑ መን እላተ ኣሴ ኣሰቶች በተአኖሃ እሁሰ ኩለኖሁ ቶነ ሰቅ ፎሎጩ ከን መጻፍ ኣዚች በትሽ ደገሞአሃን።

መጻፉስ አፎሃ

ኣጉስ (1፥1-9)

ዱእ ምኒ በላን ኬኦ አደደመተኔሃ (1፥10—4፥21)

ኮፍአአኖ ሀልለከ አበሮስ ሄኡ (5፥1—7፥40)

አመዕናኖለከ አመዕንበ መንተኔሃ (8፥1—11፥1)

አመዕነቱለከ መገኑ ኡጩኖ ሴረ (11፥2—14፥40)

መሲህ ኢሰለከ አመዕናኖ ሬሆች ኬአተኔሃ (15፥1-58)

ይሁድ ባዶን ሄኦ ኦርጨቀንቶ አመዕናኑተ ሀዕሉ (16፥1-4)

መጨረሻስ (16፥5-24)

¹ መሲህ ኢሰ ሶቀማንቶ እሆተ መገን ሰውቲሃ ገአሞም አን ጳውሎሴችለከ አመኔቤቲች ሶሰቲኔሴች

² መሲህ ኢሰ ጠሊላ አዕዮህኩተለከ ጠሊላኑተ እኮተ መገኑ ገኤስ ቆሮንቶስ ከተማን መገን አመዕናኖ ጭምት ዱእ ምኒሃ፥ አሰለከ ኒ ቀርቹ እኮ ቀርቹሃኔ መሲህ ኢሰ ሱዕመስ ጉዕመ ቤቸን ገአንቶህኩተ ጉዕሚንከ ሶኮምተ ሶህኑ።

³ አንቶኔ መገኒችለከ ቀርቹሃኔ መሲህ ኢሲች ኣሰቱትለከ ወገሬቱ ክዕኔሃ እሁን።

ጳውሎስ መገኘት ገለትጫለ

4 መሲህ ኢስ አዲን አሰሞህዕን መገን አሰቶተኔሃ ክዕን መሳን እን ጉዕመ ወክትንከ መገኘኤ ገለትጫለ።

5 መሰንትሰ አዕኑ ጠወኤነንተ ጠዋን፥ ኤንኬዕኒን ጉዕማንን መሲህ ኢስን ጉዕመ አዲንን ቀባጣመተ እኬንታእ።

6 ህትን ነኡ መሲህ ኢስተኔሃ ኩልኖንክዕን ጠዋ ክዕን በላን ጠረኝኖኡ።

7 ህከኒች ኤተሮን ቀርቼኔ መሲህ ኢስ አሜቱ አገርቴንን መገን አሰቶቶ መቱርቹሁ ሆፈአኖህዕንበእ።

8 እስን ቀርቼኔ መሲህ ኢስ ፈንቀል አሜተኖ በር ህንቄኖህዕንርቹ ኖህዕንበእረ እኮኖተ መጨርሽ ኢላ ጠረኝቴን ሄኤነንተገ አሰኖህዕን።

9 መሰንትሰ ቤትንከሰ ቀርቹሃኔ መሲህ ኢሲን ሜጡብ እሁ ሄኤህዕንተ ገኤህዕን መገኘት አመዕነሞእሃን።

አመዕኖ በላን አደደመት ሄኤ ሀሰሰኖበእሃ እሁሰ

10 አመኤ ኦሶ! መቱ ጠወ ጠወኤኖተ፥ መቱ ቀልቡለከ መቱ ሰውቱ ሄኤክዕን ቤሉ በላንከክዕን አደደመት ሄኤበእገ ቀርቹሃኔ መሲህ ኢስ ሱዕሚን ኡጫንክዕን።

11 መሰንትሰ አመኤ ኦሶ! በላንከክዕን ብተት ሄኤሰ ቀሎኤ ምኒ መኑ ኩሎኤ።

12 ህካን ዩ መት-መቱክዕን «አን ጳውሎሴሃ» ህከረንገ «አን አጵሎሴሃ» ህከረንገ «አን ጴጥሮሴሃ» ህከረንገ «አን መሲህረ» ይቴንታት።

13 መሲህ ቤህሞእንደ? ህትን ጳውሎስ ክዕንተኔሃ ሰቀለሞእንደ? ህከረንገ ጠመቀንቴንታሁ ጳውሎሴ ሱዕሚንትንደ?

14 አን ቀርሰጸሴለከ ጋኖሴ ቤሉ ክዕንተ መቱክዕን ጠመቆምበእቤቼሃ መገኘት ገለትጫለ።

15 ህካን እኮቤቼሃ አዪሁ ክዕንተ «ጳውሎሴ ሱዕሚን ጠመቀንቴንታእረ» ኖተ አታለኖበእ።

16 ህትን እስጥፋኖሴ ምኒ መነ ጠመቆም፤ ህከን ቤሉ ዋሉ መነ ጠመቆምኅር ደኅምበእ

17 መሰንትሰ መሲህ ሶኮኤሁ ተሸት ላገተ ዱዱብሶታት ቤሉ ጠመቆታትበእ፤ ዱዱብሳሚንኩ መሲህ መሰቀሉ ተሰ እህኖበእገ መን ሀይማን ደገንቶ ላጋኒበእ።

መሲህ መገን ሀይመተለከ ወልቀተ እሁሰ

18 መስቀልተኔሃ ኩሌኖ ጠዉ በኣ መኒሃ ገዊመተ እኮጎሬ ኔሳሃ ጡምናም መኒሃ መገንተ ዋልቀ።

19 መስንትሰ «ሀይቾ መን ሀይመንተ ቤሳም፤

ኤንኬዕናም መን ኤንኬዕኑ ከማም» የመም ከተበሞኡ።

20 ህካን እኮቤቹሃ ሀይቹ መንቹ አዬት? ሕግ አስተማርቹ አዬት? ከን ኣዲንያ አሌን አጥራመቻ ደገኖሁ አዬት? መገኑ ከን ኣዲንያ አል ሀይመተ ገዊመተ እህኖገ አዕዮበእንዶ?

21 መስንትሰ መገኑ ሀይማንከሰ ከን ኣዲንያ አል መኑ ገይሰ ሀይማን መገኑ ደጋበእገ ሀይማን አዕዮሰ፤ ጠዉ እኮጎሬ ገዊመገ ዋለአመኖ ነኡ ተማርሰናም እንጂሉ አመዕንታአረ ጡምሶተ መገን አምሩ እኮኡ።

22 አይሁድ መኑ መላተ ለኡ ኢትታኣ፤ ህትን ግሪክ መኑ ሀይመተ ሃሽኣኣ።

23 ጠዉ እኮጎሬ ነኡ አይሁዲሃ ጉፍቹ እኮሃ አይሁዲ እህበ መኒሃ ገዊመተ እኮ ሰቀለም ሬዮ መሲህ ዲዲብሰናም።

24 ህትን ገአሞ መኒሃ አይሁዲሃ እካን ግሪክ አፎን ጠወአኖ መኒሃ መሲህ መገንተ ዋልቀተለክ መገንተ ሀይመ።

25 መስንትሰ መገን ገዊመት መን ሀይማኝ በተኣኣ፤ ህትን መገን ላፍመት መን ዋልቃኝ በተኣኣ።

26 አመኤ አሶ! ክዕኔተ መገኑ ገኤህዕኔ ወክት ህትኔ መን እኩንታጎሬ ሰውይዬ፤ መን ሰውቲን በኣንከክዕኔ እኡ ሀይመተ ህከረንገ ልግቡ ጠረኙ ህከረንገ ልግቡ ሎርሎሩ መኑ ዮበኣ።

27 ጠዉ እኮጎሬ ሀይመተ ሙልሶተ መገኑ ከን ኣዲንያ አል ገወ መን መጠር፤ ህትን ዋልቃመተ ሙልሶተ መገኑ ከን ኣዲንያ አል ላፈ መን መጠር።

28 ከን ኣዲንያ አል ሎረ ጠወ ሆፍሶተ መገኑ ከን ኣዲንያ አል ቀዉ ጠዋሃ፤ ህንቀሞ ጠወለክ ተሰ እኮ ጠወሃ መጠር።

29 ህካን አዕዮንኩ ማለ ኦደዕዮሁ ጉዕመንኩ መገን ብሬን ቦነኖበእጋት።

30 እኮጎሬ ክዕኔተ መገኑ መሲህ ኢሲን ሜጡብ ሜጦመት ሄኣህዕኔገ አዕዮ፤ ህካን እኮቤቹሃ መገኑ መሲህ ኢሰ ሀይመኔ፤ ፈይመኔ፤ ጠሊልመኔለክ ወዝኑኔ እህኖገ አዕዮሰ።

31 ጠሊሊ መጻፋን ከተበሞገን «ድከአኖሁ ቀርቾን ድከኡን።»

2

ሰቀለሞ ኢስተኔሃ ዱዱብስሞገ

¹ አመኤ ኦሶ! አን ክዕኔቤቹ አሜቸሞ ወክት መገንተኔሃ መስከሩ* አን ጠወ ደጋምሀንገለክ ጡመገ አዕይ ጠወአሚሃ እሁኤ ለሊሶሀዕኔተ አሜቸሞበአ።

² መሰንትሶ አን ክዕኔን ሄዕዮም ወክት ሰቀለሞ መሲህ ኢሰ ቤሉ ዋሉ መቱርቹሃ ደጋምበአገ መርሲጭዮም።

³ ህካን እኮቤቹሃ ክዕኔን ሜጡበ ሄዕዮም ወክት ላፈ አክ ዋጀን አበ ሁጠኛ አሌን ሄዕዮም እቅ።

⁴ ጠዉኤለክ ትምርቱኤ መን ሀይመተለክ ጠወ መክሲን እሁዕነ መገን አያነለክ ዋልቀተ ለልሲሃት እቅ።

⁵ ህካን አዕዮሚሁ አመዕነቱክዕኔ መን ሀይመ አሌን ኡሬኢሃ እሁዕነ መገን ዋልቃን ድከዕዮሃ እሆታት።

መገን ሀይመተ

⁶ ጠዉ እኮጎሬ አመዕነቲን ጠረኝቶሀኑኡተ ሀይመ ላጋን ጠወዕናም፤ እሁን ቤሉ ጠወዕናሚሁ ከን ኣዱንያ አል ሀይመተ ህከረንገ መጨረሽ በኡ እሀኖ ከን ኣዱንያ አል ገሸኖ ሀይመተበአ።

⁷ ነኡ ጠወዕናሚሁ እኮጎሬ መገኑ ሄጭ ጉዕመ ዘማኒቶ ብርተ ኬዕምኚሃኔ ቅጥ አዕዮለክ ማጠሞ እቅ መገን ምስጥር ሀይመታት።

⁸ ከን ኣዱንያ አል ገሻኖ በላን ከ ሀይመተ አጥራመቸሁ አዪሁ ዮበአ፤ ደጎእቃኔተ ኬዕምኝ ቀርቼ ሰቀልታሰበአ እቅ።

⁹ እሁን ቤሉ ጠሊለ መጻፋን ከተበሞገን

«መን አልት ለኦበኢሃ፤

መን መጨት ሞጮጭቶበኢሃ፤

መን ቀልቡ ሰውይዮበኢሃ፤

መገኑ ኢትታሀኑኡተ ቅጥ አዕዮኡ» ዮኖ።

¹⁰ ኔሳሃ እኮጎሬ መገን አያን መሳን ምስጥርስ ለሊሾኔ፤ መገን አያኑ ጥዕላሽ እኮ መገን ሰውቱ ፈቁዕናን ጉዕመ ጠወንከ መረመረኖ።

¹¹ መንተኔሃ እኮአቀ ገይሰ አያን ቤሉ እሶን ሄዕዮ ሰውት ደገኖሁ አዬት? ህትን መገን አያን ቤሉ መገን ሰውት ደገኖሁ አዪሁ ዮበአ።

¹² መገኒቶ አስሞኔርቹ ደንጎተ መገን አያን ቶንጎም ቤሉ ከን ኣዱንያ አል አያን ቶንጎምበአ።

* **2:1** መገንተኔሃ መስከሩ፡- ዮሁ መት-መቱ ሉህ ክታበት «መገን ምስጥር ተማርሱ» ይታሉ። **2:9** ኢሳ. 64፡4።

13 ህካን እኮቤቼሃ ነኤ አመዕነት ጠወ አመዕንቶ መኒሃ ተማርሰናሚሁ መኒች ደገመኖ ሀይማን እሁዕነ መገን አያኒች ደገመኖ ሀይማኒት።

14 አመዕነቱ ዮሰበእ መንቹ መገን አያኒች ቶጎተ አታለኖበእ፤ መሰንትሰ ህትኔ ጠው እሲሃ ገውመተ፤ አያኒን እክ መረመረመኖሃ እኮቤቼሃ ደጎተ አታለኖበእ።

15 መገን አያኑ ዮሲሁ እኮጎሬ ጉዕመ ጠወንከ መረመሮተ አታለኖ፤ እሰ ገዉሰ አዬኒ መረመረመኖበእ።

16 ሁኩንን፡-

«ቀርች ሰውት አይ ደገኖ?

ሸዞሰተ አታለኖሁ አዬት?» የመሞ ከተበሞጋት።

ነኤ እኮጎሬ መሲህ ቀልቡ ዮኔ።

3

ቆሮንቶስ አመዕናኖ ኣዜን ኬኦ ብተተኔሃ

1 አመኤ ኦሶ! አን ከን ኣዲንያ አል ሰውቱ ዮህዕኔገለከ መሲሂን ጨለገ አዕዪት ቤሉ መገን አያኒን ዮ መንገ አዕይ ጠወኦተ አታሎሞበእ።

2 ጠረኘ እቸተ እት አታልትቡ ጨለገ እኬንተቤቼሃ አን ኢትሾንክዕኔሁ አዙታት ቤሉ ጠረኘተ እቸበእ፤ ቴሁ እኮጎሬ ጠረኘ እቸተ እቶኖተ አታልቲነትበእ።

3 አዕኑ ቴሁ ከን ኣዲንያ አል መን ሰውቱ ዮህዕኔ፤ ገገዉንኩዕኔ መት-መቲንከክዕኔ ሞቐኝቲነትበቼሃለከ ኦደንቲነትበቼሃ ከን ኣዲንያ አል ሰውትገ እሆንከክዕኔበእንደ? ህት እሁክዕኔ ከን ኣዲንያ አል መን ሰውትገ እሆንከክዕኔበእንደ?

4 ህትን መቱክዕኔ «አን ጳዉሎሴሃ» ዋሎዕኔንገ «አን አጵሎሴሃ» የኖሃ እኮች አመዕንቢ መንገ እሆንከክዕኔበእንደ?

5 አጵሎሰ መርቾሃን? ህትን ጳዉሎሰ መሃን? እሰ አዕኑ አመዕንቶኖተ እቶህዕኔተ ካዲመ፤ መት-መቱንኩሰ ካደንታሰ ቀርቹ መት-መቲሃሰ መደቦሰ ሆጎኒት፤

6 አን ካሾሞ፤ አጵሎሰ ዋሃ አግሾ፤ ነሴኢሁ እኮጎሬ መገኑሃን።

7 ህካን እኮቤቼሃ ሆጎተሰ ቡዕለ እኮሁ ነሴ መገኑሃ ቤሉ ካሾሁ እኮ ዋሃ አግሾሁ መርቹሃሰበእሁ።

8 ካሾሁ እኮ ዋሃ አግሾሁ ለመንኩ ቅጦሃን፤ መት-መቱሰ ሆጎሰ ወጥ ዋገ ቶገኖ።

9 ነኤ መገኒን ሜጡበ አዕናምረ ካዲመ፤ አዕኑሁ መገንተ አቡረለከ መገንየ ምኒ።

10 መገኑ አሴኤ አሰቶ ጌሲን ኤንኬዕናሙ መንቹ ምኒ እጃረኖህንገ ቀበበ መክሾም፤ ዋሉንገ እን መክሾም ቀበብ አሌን እጃረኖ፤ ጠዉ እኩጎሬ ገገዉንኩስ ከን ቀበብ አሌን ሀት አዕይ እጃረኖጎሬ አገዕሩ ሀሰሰኖስ።

11 ሜጦረ መኬ ቀበብ ቤሉ አዪሁ ዋሉ ቀበበ መክሶተ አታለኖበኣ፤ ሁኩ ቀበቡንኩ መሲህ ኢሳት።

12 ከን ቀበብ አሌን ዋርቂን፥ ብሪን፥ ጡመ ክኒን፥ ህከረንገ ሀቂን፥ ህጤንለከ ገለቢን ግንበ እጃረኖህ ሄዕዮጎር

13 መት-መቶ መንቹ ሆጉት ለልታ ፍርድ በሩ አሜተኖ፤ ህከ በር ጉዕምስ ሆጉት መሃጎር ጌራን ፊተነም ለለኖ።

14 መቱ ግንበ እጃረኖ መንቹ ቀበብስ አሌን አዕዮ ሆጉት ጌራን ፊተነም ምርተኤዕነ ጠረኝ ኡሬጎር ግንበ እጃረኖህ ዋገስ ደአኖ።

15 ሆጉስ ጌራን ቡብ በኦጎር ግንበ እጃረኖህን ዋጉ ፈቀኖ፤ እሁን ቤሉ እስ ገዉስ ጌረ ኣዚን ህግ ቡቡዕነ ፈቆ መንቹገ ጡመኖ።

16 መገን ጠሊላ ምኒ እሁክዕኔለከ መገን አያኑ ኣዜንከክዕኔ ሄኡስ ደጌነንተበእንዶ?

17 ህካን እኮቤቺሃ አዪሁ ዱእ ምኒ ድጃጎር መገኑ ገዉንከስ ድጃኖ፤ መገን ፎሎጨኖ ምኑ ጠሊላሃን፤ ሁኩ መገን ምኑ አዕኖት።

18 አዪሁ ገዉስ ጣንሱንከ፤ ከን ኣዱንያ አሌን አዪሁ ክዕኔ በሊቾ ሀይቹ እኮሃ አጉጃስ ጎሬ ሀይቹ እሆተ ገዉስ ገወ አዕይ ዋለኡን።

19 ከን ኣዱንያ አል ሀይመት መገን ብሬን ገዊመተ፤ መሰንትሰ «መገኑ ተንኮንተሰን አፈኖስ» የመም ከተበሞጋት።

20 ህትን «ቀርቹ ሀይቻኖ ሰውቱ ተሰ እሁስ ደገኖ» የመም ከተበሞኡ።

21 ህካን እኮቤቺሃ ጉዕሙርቹንኩ ክዕኔሃ እኮቤቺሃ አዪሁ መናን ድከኡንከ።

22 ህትን ጳዉሎሴሃ እኮ አጽሎስ፥ ጴጥሮሴሃ እኮ እቃ፥ ኣዱንያ አል እኮ እቃ፥ ሄኡ እኮ እቃ፥ ሬሁተ እኮ እቃ፥ ቴሱ ዮኢሃ እኮ እቃ፥ ኤተሮን አሜተኖሃ እኮ እቃ ጉዕሙንኩ ክዕኔሃን።

23 አዕኑ እኩጎሬ መሲህተ እለ፤ መሲሁንገ መገንየን።

4

መሲህ አሳበተኔሃ

1 ቲሱ መኑ ጉዕሙንኩ ኔሳሃ መሲህ አሳበተ እሁኔለከ መገን ማጠሞ ጠወ ለሊሰ ኤገት ኣሰንቶኔ መንገ አዕይ ዋለኡ ሀሰሰኖኔ።

2 ኤገተ ቶሳ መኑ አመዕነንቶእረ እክ ደገሙ ሀሰሰኖሰ።

3 ኢተኔሃ እኮጎሬ አዕኑሁ ፈረዴንተጎሬ ህከረንገ ዋሉ መኑሁ መኑ ፈረደኖገ ፈረጃኤጎሬ ኦርሸት ዮኤበእ፤ ሀንቅንከ እን ገይኤ አሌን ፈረዶተ አታላምበእ።

4 እን ደጋምገን እኮጎር ሂሉርቹ እን መቱርቹሁ ዮበእ፤ ህካን ዩኤ እን «ነጠ እሁኤ ለሊሰኖ» ዩሃበእ፤ ጠወ እኮጎሬ ኢ አሌን ፈረደኖሁ ጠለዕል ቀርቹሃን።

5 ህካን እኮቤቹሃ ወክቱሰ ኢሉዕነ ቀርቹ አሜቱዕናን ሄጭቱን አዬ አሌን ፈረደኖቹ፤ እሰ አሜተኖ ወክት ቱንሰቸን ማጠሞ ጠወ ፋሽ ለሊሰኖ፤ መን ቀልቤን ማጠሞ ሰውት ለሊሰኖ፤ ህከ ወክት ገገዉንኩሰ መገኒች ሀሰሰኖ ገለት ቶገኖ።

6 አመኤ ኦሶ! ክዕኔተ ደግለሎተ ይ ከን ጠዋን ኤሳለከ እጽሎሴ ምሳልተ አዕይ ጠወዕዮም፤ ህካንን አዕዮሚሁ «ከተበሞሀኒች ህጎት» ይታ ሸዘነ ፍሳረሰ ኒች ተማርቶኖተ ይዪት፤ ህካን እኮቤቹሃ መቱ መንቹ መቶ መንቹች በትሴን ህከን መንቹን ድከኦኖቹ።

7 መሰንትሰ እት ሚን በተአን? ህትን ኣእቶንትበእርቹ ሞ ዮኡ? ህከረ ኣእቶንቲሁ እኮጎሬ ኣእበ መንገ ሚሃ ገዋንከክ ድከአን?

8 ቲሱ ሀሰሰኖሀዕኔርቹ ጉዕመንከ ደእቲንታእ፤ ቲንገ ቀባጣመተ እኬንታእ፤ ኒች አደ እኬን ነገሴንታእ፤ ሀንቅንከ ነገሴንታ እቃን ነኡ ክዕኔን ሚጡበ ነገንሳምቤቹሃ ነገሱክዕኔ ጡመ እቅ፤

9 አዱንያ አል ጉዕሚንከ መላይካንተ መኒንከ ሙሃሌኖኔሃ እንኮም፤ መሰንትሰ መገኑ ኔሳሃ አሳበሰ ሬሁት ፈረዴመሰ መንገ መኒች ጉዕሚችን ዋሮን አዕዮኔሃ አጉደኖኤ።

10 ነኡ መሲህሃ ይን ገዋኑተ እንኮም፤ አዕኑ እኮጎሬ መሲህ ሀይቻኑተ እኬንታእ፤ ህትን ነኡ ሆሳ መነ እንኮም፤ አዕኑ እኮጎሬ ጠረኛኑተ እኬንታእ፤ አዕኑ ኬዕምኛመተ እኬንታእ፤ ነኡ እኮጎሬ ሆፍኛመተ እንኮም።

11 ቲሁ እኮጎሬ ከ ሰኣት ኢላ ጎራይናም፤ ሰገምባም፤ ከልናም፤ ኦለማም፤ ምኒ ሆንግ ኦርጨቀማም።

12 ነኡ ገይኔ አንጋን አዕነን ቆንዶድናም፤ ቦሮሮኔ መነ ማሰዕናም፤ ሸርታኔ ወክት አታዕልናም።

13 ህትን ቦሮሬመኔለከ ሱዕመኔ ቤሴመ ወክት ገዉኔ ሆፍንሰ ፈንቀሽናም፤ ቲሱ ኢላ ከን ኣዱንያ አል ሁረ እንኮም።

14 እን ከ ጠወ ከተባንክዕኔሁ ኢታም እለኤገ አዕይ ሸዘህዕኔታት ቤሉ ሙልሶህዕኔት ይደበክ።

15 መሃ እኩጎሬ መሲሂን ነስታህዕኔሩ ሄኦህዕኔጎሬ ልግቡ እን እህኖህዕኔሁ ዮበክ፤ መሰንትሰ እን መሲህ ኢሰ ኦዲን እንጂል ላጋን እሎንክዕኔ።

16 ህካን እኮቤቹሃ ኤሳሃ አጉዴን አዋንቶኖኤተ ኡጫንክዕኔ።

17 ህከን መሳን ኢተሞለከ አመዕነሞ ቀርቺን ቤቱኤ እኮ ጥማቶሴ ክዕኔቤቹ ሶኮም፤ ቤቹን ጉዕማንን አመዕናኑተ ተማርሴምሀንገ እሰ እን መሲሂን ደኤም ሃዕሮ ሄኦ ሸዘነተ ኩላኖሰ።

18 ጠዉ እኩጎሬ ክዕኔቹ መት-መቱሰ እን ክዕኔተ ለኦተ አሜታምበኢሃ አጉጃንሰ ቦንታኢት።

19 እሁን ቤሉ ቀርቹ ዬጎሬ ግደኖ በሬን ክዕኔቤቹ አሜታም፤ ህከ ወክት ጠለዕል ህከን ቦንታ መን ጠወሰ እሁዕነ ዋልቀሳ ደጎተ ሀሳም።

20 መሰንትሰ መገን ዋምነቱ ጠለዕል ጠዊን እሁዕነ መገን ዋልቃኒት።

21 አዕኑ ሀሴነንታሁ መርቾሃን? ቅጣት በርተ አፍ ክዕኔቤቹ አሜቶተ ሀሴነንገደ? ህከረንገ ኢታንለከ ገዉ ሆፍሰ አያኒን አሜቶተ ሀሴነን?

5

አመዕናኖ በላን እኮ ሂለ ጠወ

1 ክዕኔ በላን ሙልሳ ዝነት ሄኡሰ ሞጮጭዮም፤ ህትኔ ዝነት አይሁደ እህበ መኑሁ አእበሃን፤ ሁኩንን አንሰ ጫተ ገይሰ ምኒ አመገ አዕይ ሄኦኖሁ ዮኡ የመሞኡ።

2 ህካን እክ ህትኔ ሙልሲሰኖ ጠዉ በላንከክዕኔ ሄኦን ሚሃት ቦንቱነንታሁ? ባሰንከ ከን ጠዋን ሻዙ ሀሰሰኖህዕኔበኢንደ? ህትኔ ሆጉተ አዕዮ መንቹ በሊቶክዕኔ ከሜ።

3 እን መሃ እኮ እቃን ሜጡብ ሄኦበ ጎሬ ሰውቲን ክዕኔን ሜጡብ ዮም፤ ሜጡብ ሄዕዮምሀንገ እክ ህትኔ ሆጉተ አዕዮ መንቹ አሉን ቀርቾሃ ኢሰ ሱዕሚን ፈረጃም፤

4 ጭምይቲነንተ ወክት አኒሁ ቀርቹሃኔ ኢሰ ዋልቃን በላንከክዕኔ ሰውቲን ሄኦምቤቹሃ

5 መሲህ ለምቅ አሜቶን ከን መንቹ ነብሶሁ ጡሞተ ህትናሞ መንቹ ማል ሰውቱ በኦተ ሸይጣኒሃ ህግሽ ኣሱ ሀሰሰኖ ይ ፈረጃም።

6 ህዓን እኮቤቼሃ ቦኑክዕኔ ጡመሃበእ፤ ቀቅቼ ራጭቱ አበ ቡኩተ አቦከኖገ ደጌነንተበእንደ?

7 ቴሱ እኬንተሀንገ ራጭቱ ዮበእ ሃዕሮ ቡኮገ እኮኖተ ዲንኬ ራጭተ ክዕኔት ቄርሰዬ፤ መሰንትሰ ሻሽግ ሆልቼ እኮ መሲህ ኢሰ ጎረጠሞኡ፤

8 ህዓን እኮቤቼሃ ተንኩትለክ ሂሉ ጠዉሁ ዊሞ ዲንኬ ራጭቱን እሁዕን ራጭቱ ዮበእ ነጠለክ ሀንቁ ዊሞ ጦርሽ ከበጀኔ ከበጀኖ።

9 ከኒች ብርተ ከተቦንክዕኔ ሶህኖን ዝነተ አታ መኒን ሜጡ እኮኖቼ ይዮንክዕኔ እቅ።

10 ህዓን ዩእ ጉዕመ ከን ኣዱንያ አሌን ሄኣ ዝነተ አታ ህከረንገ ጎራይታ መኒች ህከረንገ ሞጋኖች ህከረንገ ሸርከተ አታ መኒን ሜጡ እኮኖቼ ዩሃአበእ፤ ህዓን እኮጎሬ ኣዱንያ አሊች ፋሉ ሀሰሰኖኔ ዩሃን።

11 እን እኮጎሬ ከተቦንክዕኔሁ አመዕናኑተ እክ ዝነተ አታሀኑኡን፤ ህከረንገ ጎራይታሀኑኡን፤ ህከረንገ ሸርከተ አታሀኑኡን፤ ህከረንገ መን ሱዕመ ቤሳሀኑኡን፤ ህከረንገ ሰከርታሀኑኡን፤ ህከረንገ ሞግታሀኑኡን ሜጡ እኮኖቼ ይይት። ህትኔ መኒን ሜጡበ እቶኖቼ።

12 መገኑ አመዕኔ ጭምቲች አብሊን ዮ መን አሌን እን ፈረደተ ሞ አግሾኤ? መገኑ አመዕኔ ጭምት ኣዜን ዮ መን አሌን አዕኑ ፈረደነንተበእንደ?

13 አመዕንትበ መን አሌን ፈረደኖሁ መገኑሃን፤ ህትን መጻፋን «ሂለ መንቹ በሊችክዕኔ ፋሽቴን ከሜ» ዩገን አዕዬ።

6

አመዕናኖ በሊች ብተተ ከሙ

1 ክዕኔች መቱ አመዕናንቹ እኮ አመሰ ቤቲን ብተሞ ጎር ጠወሰ አመዕናኑት ለኣገ እኣኖ ወጥ መገኑ አመዕንቶበእ ዳኛኖበ መርተ ሀት መለለኖ?

2 መገኑ አመዕንቶ መኑ ከን ኣዱንያ አሌን ሄኣ መን አሌን ፈረዳገ ደጌነንተበእንደ? ህከረ ኣዱንያ አሌን ፈረደዳነንታሃ እህን ከን ቀዋ ጠው አሌን ፈረዱ ቄለኖህዕኔንደ?

3 ህትን ነኡ መላይክ አሌን ፈረንዳምገ ደጌነንተበእንደ? ህከረ ባሰንከሰ ከን ኣዱንያ አል ጠዋን ፈረዱ ሀት አታልናምበእ?

4 ቴሱ ገገዉክዕኔ ብተንቴንተጎር አመዕንቶበእለክ ሀንቀንቶ መን ብርተ ጠወክዕኔ ሀት ሆንጠህሴነን?

5 ካን ያሚሁ ሙልቶኖተ ይዪት፤ ሀት አመዕናኖ በላን ሀራርሶህዕነት አታለኖ ባልቁ ዮበእንደ?

6 ህከረ መቼ አመዕኔ መንቹ ዋሉ አመዕኔ መንቹ ኦዶተ አመዕንትበ ዳኛኖበ መረኖንዶ?

7 ሀትን ገገጫክዕኔ ከሰጨንቴን ኦደሙ ክዕኔሃ ቢልኝየ፤ ባሰንከሰ አዕኑ ሞርተኡክዕኔ ህከረንገ ጣንሰሙክዕኔ ቆሀኖበእንደ?

8 እኮጎሬ አዕኑ አመዕንቶ አመክዕኔ ኦሱተ ሞርቴነንታትለክ ጣንሰቴነንታት።

9 ሾኩ መኑ መገን ዋምነቱ ዋረሳበእገ ደጌነንተበእንደ? ከን ጠዋን ጣንሰንቶኖቹ፤ ፎኩተ አታእሩ፤ ህከረንገ ሽርኬተ ሰገዳእሩ፤ ህከረንገ ዘነተ አታእሩ፤ ህከረንገ ጎኑ ጎኒን ዘነተ አታእሩ።

10 ህከረንገ ሞግታእሩ፤ ህከረንገ ጎራይታእሩ፤ ህከረንገ ሰከርታእሩ፤ ህከረንገ መን ሱዕመ ቤሳእሩ፤ ህከረንገ ዘረፋእሩ መገን ዋምነቱ አጋበእ።

11 ክዕኔኝ መት-መቼክዕኔ ሀትናመተ እቅ፤ ቲህ እኮጎሬ ቀርኝ መሲህ ኢሰ ሱዕሚንለክ ኒ መገን አያኒን ጨቢኝ ነጠ እኬንታእ፤ መገኒሃ አደ እኮ ጠሊለ ኡመትለክ ፈየ እኬንታእ።

ጅሰመኔ መገን ኬዕምኚሃ እኡ ሀሰሰኖሃ እሁሰ

12 «ጉዕመርቹንኩ ፈቀደሞኤ» እኮጎሬ ጉዕመርቹንኩ ደግለለኖኤ ዩሃበእ፤ ጉዕመርቹንኩ ፈቀደሞኤ፤ እሁን ቤሉ እኮሰ ጠዊሃ ርሰ እክ ጠገማምበእ።

13 ሀትን «እቸት ጎዳቢሃ፤ ጎደቡንኩ እቻታት» እኮጎሬ መገኑ ለሙንከሰ ቤሰኖ፤ ጠጪ እኮጎሬ ጅሰሙኔ ቀርኝ ኢሲሃ፤ ቀርቹ ኢሰን ጅሰሚሃኔ እኮቤቹሃ ጅሰመኔ ዝናተ ህግንሰ ኣሱ ሀሰሰኖኔበእ።

14 መገኑ ቀርቹ ኢሰ ሬሆኝ ኬሾሰ፤ ኔሳህ ዋልቃንከሰ ሬሆኝ ኬሰኖኔ።

15 ጅሰሙክዕኔ መሲህ ጅሰመ እሁሰ ደጌነንተበእንደ? ህከረ አን መሲህ ጅሰመ መሰ ዘነተ አታ መንቹ ጅሰመ እኡ ሀሰሰኖንዶ? ሆሮ ሀሰሰኖበእ!

16 ዝነተ አታ መንቹን ደቀመኖ መንቹ እሴን ሜጡ ጅሰመ እሁሰ ደጌነንተበእንደ? «ለሙንኩሰ መቼ ጅሰመ እካእ» የመም ከተበሞኤ።

17 ቀርቹን ሜጡበ ገውሰ መቼ አእኖ መንቹ እሲን ሜጡበ አያኒን መቼ እሆኖ።

18 ህካን እኮቤቼሃ ዝነተ አቶኖቼ፤ መኑ አአኖ ዎሉ ጨቡ ጅሰሚቶስ አብሊን እህኖሃን፤ ጠዉ እኮጎሬ ዝነተ አአኖ መንቹ ገይሰ ጅሰም አሌን ጨብ አአኖ፤

19 ጅሰሙክዕን መገኒቶ ቶጌንታእለከ ኣዜንከክዕን ሄአኖ ጠሊሉ አያኑ ፎሎጨፍ ቤቹ እሁስ ደጌንነተበእንዶ? ቲሱ አዕኑ መገንረ ቤሉ ገይክዕኔረበእ።

20 እስ ዋጊን ህዕርዮህዕኔ፤ ህካን እኮቤቼሃ ጅሰምንከክዕን መገኑ ኬዕምሹ።

7

ጎጆሃ እህተኔሃ ኣሰንቶ ሸዘነተ

1 አዕኑ ከተቤንተኤ ጠዉተኔሃ እኮጎር መኑ ሚንቱ ኤቡዕነ ፈቆእቃ ጡመሃን።

2 ጠዉ እኮጎሬ ዝነተ አኢቶ አገዕርተኔሃ መት-መትህስ ገይሰ ጫት ሄኡንሰ፤ ህትን ገዬተሴ ገይሴ ጨዉ ሄኡንሴ።

3 ሞንሴ አኑ ገይሰ ጫን ሚጡብ ኦሰአኖ ሀንቅሴ ከሙንከ፤ ህትን ጫንት ጨይንከሴ ሚጡብ ኦሰአኖ ሀንቅሴ ከንቱንከ።

4 ጫት ገይሴ ጅሰም አሌን ሹምነቱ ዮሴበእ፤ እሴ ጅሰም አሌን ሹምነቱ ዮሴሁ ጨዉሃሴት፤ ህትን ጨዉ ጅሰምሰ አሌን ሹምነቱ ዮሰበእ፤ እሰ ጅሰም አሌን ሹምነቱ ዮሴሁ ጫታት።

5 ህትን ዱኣ አቶኖተ ኢተቀንቲን ቀዎ ወክቲሃ አገሩ እህባቶ ገገዉክዕኔ ከዕመቀንቶኖቹ፤ ህትን ገዉ አገዕሩ ሆግን ሺይጣኑ ሉሲስኖህዕኔበእገ ፈንቀልቲን ሚጡብ እኬ።

6 ጠዉ እኮጎሬ አን ካን ያንክዕኔሁ ሸዘነገ ያንክዕኔ ቤሉ አዘዘጋበእ።

7 መኑ ጉዕሙንኩ ኢገ እኮ እቃን ኢታም እቅ፤ ጠዉ እኮጎሬ መገኑ መት-መትህስ አደደ ኣሰቱተ ኣሴእ፤ ህካን እኮቤቼሃ መትህስ መቱ ኣሰቱት ሄኣሰ፤ ህትን ዎልህስ ዎልት ኣሰቱት ዮሰ።

8 ሞኒሃ እኮበእሩለከ ህትን ሞንሰ አኑ ሬዮ ሚንቱሁ ኤቡዕነለከ ገልቱዕነ ኢገ እክ ሄኑ እቃን ጡመ እቅ።

9 ጠዉ እኮጎሬ ሄዕላቲነን ቡቢቶ ጎጆሃ እሁ ቆህኖቤቼሃ ገዉሰ አታዕሉ ሆጋ ወክት ጎጆሃ እኩን።

10 ጎጆሃ እኮሀኑተ ኣሳም ትዛዙ ከኒት፤ ሁኩ ትዛዙንኩ ቀርቺሃ ቤሉ እሃበእ፤ ገልቶ ጫት ሞንሴ ኢኒቶ መለዕለንቱንከ።

11 መለዕለንቶጎሬ ሜጥሃሴ ሄኡን ህከረንገ ጨይንከሴ ሀራዕረንት ሄኡን፤ ህትን ሞንሴ አኑ ጫሰ ገፈሩንከ።

12 ዎልሀሰ ቀርቼ ኢሰ እሁዕነ እን ያሚሁ መቶ አመዕኔ መንቺሃ አመዕንቶበእ መንቺት ዮሰጎሬ እሴን ሞንሴ አኒን ሜጡበ ሄኡተ ሀሶ ጎሬ ገፈሩንከ።

13 ህትን አመዕንቶበእ ሞኒ አኑ ዮሴ መንቺት ሞንሴ አኑ እሴን ሜጡበ ሄኡተ ሀሾ ጎሬ ገፈሩንከ።

14 መሰንትሰ አመዕንቡ ሞኒ አኑ አመዕንቶ መንቺ መሳን መገኒሃ አደ እኮሃ አሀኖ፤ ህትን አመዕንቶበእ መንቺት አመዕንቶ ሞንሴ መንቺ መሳን መገኒሃ አደ እኮሃ እካእ፤ ህካን እሀባቶ እለክዕኔ መገኒሃ አደ እኮተ አታልታበእ፤ ጠዉ እኮጎሬ ከን ሃሊን ሄኤንተ ጎር እሶክዕኔ መገኒሃ አደ እኮሃ እካእ።

15 አመዕናንቺ እኮበእ አዲ አደ እሆተ ሀሾ ጎር አደ እሁን፤ ጠዉ እኮጎሬ ከን ወክቲን አመዕናንቺ እኮሁ ሞኒ እነ እኮ ሞኒ አመተ መቶርቸን ግዳጅሴኖሰበእ፤ መገኑ ገኤኔሁ ወገሬቲን ሄዕኖታት።

16 አት አመዕንቶንት ጫት አመዕንቡ ሞንክ እነ ጡምሳንትጎር ሚን ደገን? ህትን አመዕንቶንት ሞኒ አኑ! ሞንክ አመተ አይደላ ጡምሶተ አታልታ ጎሬ ሚን ደገን?

መገኑ ገእኖ ወክት ዮመ ሃሊን ተሬገጡ ሀሲሰኖ

17 መት-መቱሰ መገኑ ሄእ ዬሰ ሃሊንለከ መገኑ ገኤሰ ሃሊን ሄኡን፤ መገኑ አመዕኔ መን ጭምቲሃ ጉዕሚንከ አሴ ትዛዙ ከኒት።

18 ህትን ጡርከመሞቶ ኤተሮን አመዕኔ መንቺ እዪሁ ሄዕኖ ጎሬ ጡርከመሞበእህንገ እሆተ ሰውዩንከ፤ ህትን ጡርከመዕናን ሄጭ አመኔኢሁ ጡርከሚሃ ሀሱንከ።

19 መሰንትሰ መገን ትዛዝ አገሩሃ ቤሉ ጡርከመሙ ህከረንገ ጡርከመሙ ሆጉ መቶርቸሃ ደግለለኖበእ።

20 ህካን እኮቤቺሃ ገገዉንኩሰ መገኖን አመዕኔ ወክት ዮ ሃሌን ሄኡን።

21 ህትን አት መገኑ አመዕንቶንት ወክት ርሰቺሃ እቅንዶ? እኮንት እቃ ሆሮ ሰዉ ይቶት፤ እኮጎሬ ሰዎልድማን ፋልቶተ መኩተ ደእቶንት ጎር ሆሮ አጉርቶት።

22 መሰንትሰ ሰዎልድማን ሄዕኖገ ቀርቼ አመዕኔ መንቺ ቀርቺን ሰዎልድቺሃን፤ ህትን አመዕነኖ ወክት ሰዎልድቺ እኮ መንቺ መሲህየ ርሰቺ።

23 አዕኑ መሲህ ኢሰ ዋግን ሀዕሬኔቤቺሃ መኒሃ ርሰ እኮኖቼ።

24 ህዓን እኮቤቼሃ አመኤ ኦሶ! ጉዕሙንኩ መኑ ገአሞ ወክት ዮ ሀለቲን እክ መገኒን ማጡበ ሄኡን።

ጎጆሃ እኮበእ መኒሃለከ ሞንሰ እኑ ሬዮ ማንቲሃ ሆንጠኮ ጠዕምቱት

25 ቲሱ ጎጆሃ እኮበእ መንተኔሃ ቀርቾ ኢሲቾ ቶጎም ትዛዙ ዮኤበእ፤ ጠዉ እኮጎሬ አመዕነሞሚሃ እሆተ መገኒቾ ማርቱተ ደኤም እኮቤቼሃ ገይኤ ሰዉት ኣሳንክዕኔ።

26 ከን ዘማን ኦርሸተኔሃ መኑ ዮ ሃሌን ሄኦኖረ ጡመ አጉደኖኤት።

27 ህዓን እኮቤቼሃ ጎጆሃ እኮንትጎር ሸርቶተ ሀሶት፤ ጎጆሃ እኮዕነ ዮንት ጎር ኤቦተ ሀሶት።

28 ጠዉ እኮጎሬ አት ጎጆሃ እኮንትጎር ጨብ እሆኖ ዩሃበእ፤ ህትን መት ሀፍቱት ጎጆሃ እኮ እቃን ጨብ እሆኖሴ ዩሃበእ፤ እሁን ቤሉ ጎጆሃ እካ መኑ ከን ኣዱንያ አሌን አበ ኦርጨቀንታእ፤ አዕኑ ከኒቾ ፈቄንታ እቃን ኢታም እቅ።

29 አመኤ ኦሶ! ዘማኑ ገበንቹ እኮቤቼሃ ከን ወክቲቾ ጀመር ሞኒ አመት ዮሲሁ ሞኒ አመት ዮሰበእሀንገ እክ ሄኡን፤ ሞኒ አማኑት ዮሰሩ ዮሰበእሀንገ እክ ሄኡን።

30 ህትን ሻዛሩ ሻዛበእገ እክ ሄኡን፤ ሙንደኣእሩ ሙንደኣበእገ እክ ሄኡን፤ ኦዳተ ሀዕርታሩ ኦዳተ ዮሰበእሀንገ እክ ሄኡን።

31 ህትን ከን ኣዱንያ አሌን ዮኢሃ ገይሳሃ አታሩ ጉዕሙንኩ ደግለሸቀንታበእገ እክ ሄኡን፤ መሰንትሰ ከን ኣዱንያ አሌን ዮኢሁ ጉዕሙንኩ ህገኖሃን።

32 አዕኑ ሻዘኑዕናን ህከኒሃ ሄኦኖተ ኢታም፤ ጎጆሃ እኮበእ መንቹ ቀርቹ ሙንዲሲሰኖ ጠወሃ ሀሰኖቤቼሃ ቀርቾ ጠዊተኔሃ ሰዉ ዮኖ።

33 ጠዉ እኮጎሬ ጎጆሃ እኮ መንቹ ሞንሰ አመተ ሙንዲሲሰኖ ጠወ ሀሰኖቤቼሃ ከን ኣዱንያ አል ጠዊተኔሃ ሰወዮኖ።

34 ህከን መንቹ ቀልቡንኩ ለሙ አደ እኮእሃን፤ ህትን ጎጆሃ እኮበእ መንቹት ህከረንገ ሀፍቱት ማሉሴለከ ሩሁሴ ጠሊሊ እክ ቀርቹሃ እኮተ ሰዉ ይታቤቼሃ ሰወቱሴ ጉዕሙንኩ ቀርቾ ሆጎ አሌኒት፤ ጎጆሃ እኮ መንቹት ጫሴ ሙንዲሲሶተ ሀሳቤቼሃ ከን ኣዱንያ አል ጠዊተኔሃ ሰዉ ይታእ።

35 አን ህት ዩንክዕኔሁ ዎሻዲን አፎሀዕኔተ እሁዕነ ክዕኔሃ ደግለለኖ ይጹት፤ ህትን ሀሰሰኖ ሃሊን ሄኦኖታትለከ ሰዊቱክዕኔ ብንዩዕናን ዊመ ቀልቢን ቀርቾ ኢሳን ጠረኝቲን ሄኦኖታት።

36 መቱ መንቹ ኢተቀሞ ጨልተ መዕሲሰንታ ጌሰ እኮ ወክት ገዉሰ አታዕሉ ሆጊን ኣኣተ ሀሾ ጎሬ ከመኖሰ ጠዉ ዮበእ፤ እሴንተ ኣኡን፤ ሁኩን ጨብያበእ።

37 ጠዉ እኮጎሬ አዪሁ ኢተቀሞ ጨልተ ኣኣተ ግዳጅሰኖስ ጠዉ ዮስበእጎሬ ኣኡዕነ ዱንኮተ አታሎጎሬ ጠወሰ ቀልቤንከሰ ሙርሲጨፍኢች ሁኩ መንቹ ጡመ አዕዮኡ።

38 ህካን እኮቤቹሃ ጠዕሜ ጨልተ ኣኡሰ ጡመ አዕዮኡ፤ ጠዉ እኮጎሬ አኡነ ፈቆሁ ቆሀኖሃ አዕዮኡ።

39 መት መንቹት ጨዉሴ ፎሊን ዮ ጌሳን ንክን ኡሱረንቶአተ፤ እኮጎሬ ሞንሴ አኑ ሬዮ ወክት ገልታ መንቹ አመዕናንቹ እሁን ቤሉ ሀሶሀኒን ገልቶተ አታልታኦ።

40 ጠዉ እኮጎሬ አን ሰውያም ሃሌን ህት ጫት ገልቱዕናን ሄኦ እቃን አበ ሙንዲኖን ሄኦ እቅ፤ ህትን ኤሳሃ መገን አያኑ ዮኤሃ አጉደኖኤት።

8

ሸርኬተ ክትመሞ ማልተኔሃ

1 ሸርኬተ ክትመሞ ማልተኔሃ ጉዕሚንከኔ ኤንኬዕኑ ዮኔ፤ ኤንኬዕኑ ቦንሲሰኖ፤ እኮጎሬ ኢተት ጠረኝሳኦ።

2 መቱ መንቹ «ኤንኬዕኑ ዮኤ» ይ ሰዉ ዬጎሬ ሁኩ መንቹ ደጉ ሀሰሰኖሰ ጌሰ ሆሮ ደጎበኦ።

3 ጠዉ እኮጎሬ መቱ መንቹ መገኑ ኢቱሰጎሬ ሁኩ መንቹ መገን ቤቸን ኤንኬዕነሞሃን።

4 ህካን እኮቤቹሃ ሸርኬተ ክትመሞ ማለ እትተኔሃ እኮጎሬ ሸርክተ ጉዕሙንኩ ከን ኣዱንያ አሌን ሄእባሃ እሁሰለከ መቶ መገን ቤሉ ዋሉ መገኑ ሄእባሃ እሁሰ ደንጋም።

5 መሰንትሰ ልግቡ ሸርክተለከ ልግቡ ቀርቹ እኮእሩ ዮኡ፤ ጠዉ እኮጎሬ ሄንከ ሰማንለከ ኡላን «መገኑ» ዬኖሰሩ ሄኦ ጎሬ

6 ጠዉ እኮጎሬ ኒ መገኑ ጉዕመርቹንከ ከለቆለከ ነኡሁ እሲሃ እንኮሞሩ መቱ መገኑ አነ እኮኔሁ ዮኔ፤ ህትን ጉዕሙርቹንኩ እሰ አዲን ከለቀሞለከ ነኡሁ እሲን ሄዕናም መቱ ቀርቹ መሲህ ኢሰ ጠለዕል ዮኔ።

7 ጠዉ እኮጎሬ ካን ጉዕሙ መኑ ደገኖበኦ፤ መት-መቱ ከበሬ እለ ሸርኬን ርሰቀንቶቤቹሃ ማለ እታኢሁ ሸርኬተ ክትሚመሀኒን አት ሰዉ ይታቤቹሃት፤ ህካን እኮቤቹሃ ቀልቡሰ ላፈ እኮቤቹሃ ንጃሳኦ።

8 ኔሳሃ መገን አደ ሆንጠህሰኖኔሁ እቸተበኦ፤ እንትበጎሬ ጤዕዮኖኔርቹ ዮበኦ፤ እንቶምአቃ በርገመኖኔርቹ ዮበኦ።

9 ጠዉ እኮጎሬ ሁኩ ሰዎልድመኔ አመዕነቲን ጠረኝቶበኦ መኒሃ ሉሰሰኖሃ እህኖሰበኦ እገዕርዬ።

10 መሰንትሰ አዪሁ አት ኤንኬዕኑ ዮኤ ይታንቲሁ ሸርኬ ሞኔን ማዳን አፋዕልት እተን አመዕነቲን ጠረኝቡ መንቹ ለዕዮሄጎሬ

ሽርኬሃ ክትሚመ ማለ እቶተ መለለኖገ አታንትበእንደ? «ኤንኬዕኑ ዮኤ» ይት ሽርኬተ ክትመሞ ማለ እተኖገ ሀንበለንሰኖሰበእንደ?

11 ህካን እኮቤቹሃ መሲህ እስተኔሃ ሬዮ ሁኩ አመዕነቲን ላፋ መንቹ ኪ ኤንኬዕኒን በእኖ ዩሃን።

12 ከን ሃሊን አመዕኖኖ አሌን ጩብ አቲነንተለከ ላፈሰ ሰዉት ጡላይሴነንተ ወክት መሲህ አሌን ጩብ አቲነንታት ዩሃን።

13 ህካን እኮቤቹሃ እቸት አመዕኖንቹ አመኤ ቤቲሃ ጉፍቹ እሀኖሃ እኮች አመኤቤቹ ሉሰሳምሀኒች ማለ ሆሮ እታምበእ።

9

አሳበት እኡ ሀሰሰኖ ጠውተኔሃ

1 አን ሰዎልድቹሃበእንደ? ህትን አን አሳቤቹሃበእንደ? አን ቀርቹኔ ኢሰ ለእዮንሰበእንደ? አዕኑንገ ቀርቹሃ ኢሲን አዕዮም ሆጎእየ ላልቹበእንደ?

2 ቀርቹሃ ኢሲን አዕኑ ኤሳሃ አሳቤቹ እህእ መላተ እኬንተቤቹሃ ዋሎ መኒሃ ሶቀማንቹ እህበጎሬ አን ክዕኔሃ ሀንቅንከ አሳቤቹሃን።

3 ሱዕመኤ ቤሳ መኒሃ ፈንቀሻም መሰሉ ከኒት።

4 ኔሳሃ እቲሃለከ አጊሃ ሀንቁ ዮኔበእንደ?

5 ዋሎ አሳበገለከ ቀርቹሃ ኢሰ አመ ኦሶገ ህትን ጴጥሮሴገ መገኑ አመዕንቶ ምኒኔ አማኑተ አዋንሰን ሚጡበ ሃሞተ ሀንቁ ዮኔበእንደ?

6 ህከረንገ ሆጎን አጸመን ሄኡ ሀሰሰኖኔሁ ጠለዕል እንለከ በርናባሴቲንደ?

7 ገይሰ ብሪን ዎታደርቹ እክ አእኖ መንቹ ሄእኖንደ? ህትን ዎይን ሀቀ ካሽ ላልቹሰ እትባሁ አዬት? ህትን ለሉ ጠቅ ለልሰ አዙተ አገኖበእሁ አዬት?

8 አን ከ ጠወ ጠወአሚሁ መኑ ሰውየኖ ሃሊንትንደ? ሕጉሁ ህት የኖበእንደ?

9 መሰንትሰ «ዉጠተ ዎቀሬኖ ቦር አፎሰ ኡሱርቶት» የመም ሙሲ ሕጋን ከተበሞኡ፤ መገኑ ህካን ዬኢሁ ቦረተኔሃ ሰውየኖቤቹሃትንደ?

10 መገኑ ህካን ዬኢሁ ኒተኔሃበእንደ? ለሙንኩ ዉጣች ወጥሰ ደእቶተ አቡረኖሁ ተብሴን አቡረኖቤቹሃ፥ ዉጠተ ዎቀረኖንኩ ተብሴን ዎቀረኖቤቹሃ ሁኩ ጠዉ ከተበሞሁ ሀንቅንከ ኒተኔሃት።

11 ነኡ ክዕኔ በላን መገን ጠወ ዉንጣምረ እንኮሚች ኔሳሃ ማሊሃ ደግለለኖርቹ ኣእኖም ጎሬ ሁኩን ሎረ ጠወንደ?

12 ዋሉ መኑ ክዕኔኝ ሀሰሰኖሳሃ ኣእቶተ ኣታልታኢሃ እኮኝ ነኡ በትንሰ ኣኡ ሀሰሰኖኔበእንደ? ጠዉ እኮጎሬ መሲህ ተሸት ላገት አልባዕልታቤቹ ከማምበእገ ይን ጉዕመ ጠወንከ ኣታዕልናም ቤሉ ኔሳሃ ሀሰሰኖኔርቹሃ ኣእኖተ ሀንሶምበእ።

13 መገን ሞኔን ኣታ መኑ እታኢሃ መገን ሞኒኝ ደእታገለከ መገኒሃ ክትም ሆንጠህሴኖ ጠረጴዚኝ መኑ ክትሚሃ ሆንጠህሴመርቹኝ ቤቀንት እታኢሃ ደጌነንተበእንደ?

14 ህከንገን ተሸት ላገተ ዱዱብሰታ መኑ ተሸት ላገ ሆኅኝ ርስቀሰ ደእታገ ቀርቹ አዘዦኡ።

15 እኮጎሬ አን ከን ጉዕማንከ ሀንቂኝ መቶንከሰ ደግለሸቀምበእ፤ ቴሱ ከተባሚሁ ህትኔ ጠዉ እሆኡተ ሀሸበእ፤ መሰንትሰ አን ድከአም ጠወ አዪሁ ተሰ አእኖሀኒኝ ሬሁ ቆሀኖኤ።

16 ህትን ተሸት ላገተ ዱዱብሱ ኤሳሃ ግደ እኮቤቹሃ ተሸት ላገተ ዱዱብሲንከኤ ቦናምርቹ ዮኤበእ፤ ህኅን እኮቤቹሃ ተሸት ላገተ ዱዱብሰበጎሬ ኤሳሃ ኣዬ!

17 መሰንትሰ አን ገወእ ኢት እንጂሊ ዱዱብሳሚሃ እኮምጎሬ ዋጉ ዮኤ፤ ጠዉ እኮጎሬ ግዲን አአሚሃ እኮምጎሬ ኤገት ኣሰንቶኤቤቹሃ አአሚት ዩሃን።

18 ህከረ ሆጎኤ ዋጉ መርቹሃን? ቴሱ ሆጎኤ ዋጉ ተሸት ላገተ ተማርሴምቤቹሃ ዮኤ ሀንቅ ደግለሸቀሙዕናን እንጂሊ ተማርሳም ሆጉኤን ደሞዝ ቤሉ ተማርሱሃን።

19 መኒኝ ጉዕሚኝን ሰዎልድቹ እኮምጎሬሁ ልግብ መነ ፈይሶተ ይ መኒሃ ጉዕሚንከ ገጉኤ ርስቹ አዕዮም።

20 ህትን አይሁድ መነ ጡምሶተ ይ አይሁዲሃ አይሁድገን እኮም፤ ህትን ሕግ ኣዜን ሄዕበጎሬሁ ሕግ ኣዜን ሄኦእረ ጡምሶተ ይ ሕግ ኣዜን ዮ መንገ እኮም።

21 ህትን ሕጉ ዮበእ መነ ጡምሶተ ይ መገን ሕጉ ዮኤሃለከ መሲህ ሕግ ኣዜን ሄዕዮሚሃ እኮምገን ሕጉ ዮበእ አይሁድ እኮበእ መኒሃ ሕጉ ዮበእ መንገን እኮም።

22 ህትን አመዕነቲን ላፈ መነ ጡምሶተ ይ ላፈ መኒሃ ላፈ መንገን እኮም፤ ኣታልሲሾኤ ጌሲን ቀዉ መነ ጡምሶተ ይ ጠዋን ጉዕማንን መኒሃ እሰገን እኮም።

23 አን ተሸት ላገ ማሰተ ቤቀማንቹ እሆተ ይ ተሸት ላገተኔሃ ህከ ጉዕመንከ ጠወ አዕዮም።

24 ሃጫቀመኖቤችን ደጉደኖሁ ጉዕሙንኩ ሃጫቀመኖገለክ ጠለዕል ሜጥቼሰ ሽልማት ኣኣኖገ ደጌነነተበእንደ? ህትን ሽልማት ደእቶኖተ ሃጫቀመኖ።

25 ሃጫቀመኖሁ ጉዕሙንኩ ጉዕመርቸንን ጅሰመሰ ጠረኝሽ ቅጥኣኣኖ፤ እሰን ህት ሆጋኢሁ በኣኖሃለክ ወክቲሃሰ እሀኖ ሽልማት ደኢሃት፤ እኮጎሬ ነኡ ሆንጋሚሁ በኣኖበኢሃለክ ዘላለሚሃ እሀኖ ሽልማት ደኢሃት።

26 ህካን እኮቤቹሃ እን ሰውቱ ዮበእ መንገ ደጉዳምበኣ፤ ህትን ቦብረ ጠንጤን ዋቀረኖ መንቸገ ጠለዕለ ኣኣምበኣ።

27 ጠዉ እኮጎሬ ዋሎ መኒሃ ዱዱብሴሚቸ ኤተርን ገጉኣ ኡቦሚሃ ኣሃምበእገ አልኤ ቀጠኣን ኣዘዘመኖኤገ ኣኣም።

10

ሸርኬተ ሰገዱ ገበእባሃ እሁሰ

1 አመኤ አሶ! ኣናከኔ ጉዕሙንኩ ጎመት ኣሊን እክ ኣዎንሰተንሰ ጉዕሙንኩ ባረ ቶልቶገ ደጎኖተ ሀሳም።

2 እሰን ጉዕሙንኩሰ ሙሲን ሜጡ እኮተ ይት ጎማንለክ ባራን ጠመቀንቶኡ።

3 ህትን ጉዕሙንኩሰ መቱ ደነ ሰሜ እቸተ እቶኡ።

4 ህትን ጉዕሙንኩሰ መቱ ደነ ሰሜ ኣጌኖሃ እጎኡ፤ ኣጎኣንኩ ኣዎንንሰ ሄዕዮ ሰሜ ክኒቸ ቡቆኢሃ እቅ፤ ሁኩ ክኑንኩ መሲህት እቅ።

5 እኮጎሬ እሰ ኡለ ኡዱማን ጎፎቤቹሃ መገኑ እሳቸ ልግብንከሰ ሙንደዕዮበኣ።

6 እሰ ሂለርቹ ሄዕላቶገን ነኡ ሂለርቹ ሄዕላንታምበኣገ ኩ ጠዉ ጉዕሙንኩ ኣገዕርናምገ ምሳልተ እኮኔ።

7 መጻፋን «መኑ እቶተለክ ኣጎተ እፋዕልቶኡ፤ ቦሎቸ ከዲሃ ኬኦኡ»* የመም ከተበምገን እሳቸ መት-መቱሰ ሸርኬተ ሰገዳእረ እኮገን ኣዕኑሁ ሸርኬተ ሰገዴነንተረ እኮኖቹ።

8 እሳቸ መት-መቱሰ ዝነተ እት መቶ በሬን ለሞድምኔ ሰሶ ኩሜ መኑ ሬቶገን ነኡሁ ዝነተ ኣዕኑንከ።

10:1 ፋል. 13፡21-22፤ 14፡22-29። 10:3 ፋል. 16፡35። 10:4 ፋል. 17፡6፤

ዘኹ. 25፡1-18። 10:5 ዘኹ. 14፡29-30። 10:6 ዘኹ. 11፡4። * 10:7 ዳንሰ ደነሲሃ፡- የግርክ መጻፋን ኣለሻተ የኖ፤ ህካን የ ሸርኬተ ሰገዱለለክ ዝነተ ኣኡሰ ለሊሰኖ።

10:7 ፋል. 32፡6። 10:8 ዘኹ. 25፡1-18።

9 ህትን እሳችን መት-መቱስ ቀርቼ † ፊተንቶገለከ ዋሪቹ ከር ሼሰገን ነኑሁ ቀርቼ ፊተኑንከ።

10 ህትን እሳች መት-መቱስ ቁንቁቶገለከ ቤሳንቹ መላይኬቹ ቤሾሰገን አዕኑሁ ቁንቁቶኖቹ።

11 ኩ ጉዕሙንኩ ጠዉ እስ አሌን እሁስ መጨረሽ ዘማኔን ሄዕናም ነኑ አገዕርኖተ ትምርተ እክ ከተበሞኔ።

12 ህካን እኮቤቺሃ ጠረኝ ኡሬኢሃ አጉደኖሲሁ አዪሁ ኡበኖበእገ ገወሰ አገዕሩን።

13 መናን ኢለኖሀኒች አደ እኮ ኦርሸት ክዕኔ አሌን ኢልቶሀዕኔበእ፤ መሰንትሰ ዋልቃችክዕኔ ሎረ እኮ ዋቄን ኦርጨቀንቶኖተ ሰውየኖ መገኑ አመዕነሞእሃን፤ እሰን ኦርሸሰ አታዕል አታልቶኖተ ኦርሻንከሰ ሜጡበ ኦርሻችሰ ፋልቲነንተ ዋቃሃ ቅጥ አዕዮኡ።

14 ቲሱ ኢ ጃለ! ሸርኬተ ሰገዲች አገዕርዬ።

15 ህካንን ያሚሁ ዘህጭቲነንተረ እኬንተቤቺሃት፤ ህካን እኮቤቺሃ ጠወዕዮም ጠውተኔሃ አዕኑ ገዉክዕኔ ፈረጄ።

16 ነኑ መገኑ ገለትጭን አንጋም ማሰአም ጠበቲሁ መሲህ ቄጊን መቱሃበእንደ? ህትን ሜጡበ እንታም ዳቡት መሲህ ጅሰሚን መቱሃበእንደ?

17 መሰንትሰ ዳቡስ ሜጥተ እኮቤቺሃለከ ህከን መቲ ዳቦች ቤቀማምቤቺሃ መሃ ልግብ መነ እንኮምኅሬሁ ነኑ መቶሃ ጅሰመ።

18 ህንዴ እስራኤል ኡመትተኔሃ ሰውይዬ፤ ክትሜኖርቹ እታ መኑ መገኒሃ ክትም ሆንጠህሴኖ ጠረጴዚን ሜጡበ ዮረበእንደ?

19 ህከረ ህካን ያም ወክት ሸርኬተ ክትሜመ ማሉ ቆሀኖርቹ ዩሃሰንደ? ህከረ ሸርክት ቆካኦ ዩሃኤንደ?

20 ህትኅተበእ፤ ህንቅ መገኑ ደግቡ መኑ ክትም ሆንጠህሳኢሁ ሩሃንይሃት ቤሉ መገኒሃበእ፤ ህካን እኮቤቺሃ አዕኑ ሩሃንዬን ሜጡ እኮኖተ ሀሳምበእ።

21 ህትን አዕኑ ቀርች ጠበቲች አጌነን ሩሃንይ ጠበቲች አኅኖተ አታልቲነንተበእ፤ ህትን ቀርች ማዲችለከ ሩሃንይ ማዲች ቤቀንቶኖተ አታልቲነንተበእ።

22 ቲሱ ነኑ መገኑ ኡሙርሲንሱንደ? ነኑ እሲች አበ ጠረኝናምንደ?

† **10:9** ቀርቹ፡- የኖሁ ግርክ መጻፉ «መሲህ» የኖ። **10:9** ዘኑ. 21፡5-6። **10:10** ዘኑ. 16፡41-49። **10:16** ማቶ. 26፡26-28፤ ማር. 14፡22-24፤ ሉቃ. 22፡19-20። **10:18** ሉዊ 7፡6። **10:20** ዘዲ. 32፡17። **10:22** ዘዲ. 32፡21።

23 ጉዕሙርቹንኩ ፈቀደሞኤ፤ እኮጎሬ ጉዕሙርቹንኩ ደግለለኖበአ፤ ህትን ጉዕመ ጠወ አኢሃ አታሌኖ፤ እኮጎሬ ጉዕሙርቹንኩ ጠረኝሰኖበአ።

24 አዪሁ ገይሰ መኩተ ጠለዕል እሁዕነ ዎሎ መን መኩተ ሀሱን።

25 ቀልቢችክዕኔ ኬኣ ሸክተ ከንቴን እኮሰ ጌባን ህሬኖ ማላ ለሞሶኑዕናን እቼ።

26 መሰንትሰ ዱንያ አሌንለከ ኣዜሴዮርቹ ጉዕሙንኩ ቀርችሃን።

27 መገኑ አመዕንዮበእ መኒች መቼ እቴኖሃ ቅጥ አዕይ ገኤጎሬ አዕኑ መርቶኖተ ሀሴንተ ጎሬ ኣሴመህኔሃ ጉዕመንከ ቀልቤንከክዕኔ ለሞሶኑዕናን እቼ።

28 ጠዉ እኮጎሬ አዪሁ «ኩ ማሉ ሸርኬተ ክትመሞኢሃን» ዩህዕኔጎሬ ህከ ኩሎህዕኔ መንች መሳንለከ ቀልብ ዎቐሽ ሰውትተኔሃ እቶኖቹ።

29 ህካን ዩሚሁ መንች ቀልብ ሰውትተኔሃት ቤሉ ኪ ቀልብ ሰውትተኔሃትበእ፤

መሰንትሰ ዎሎ መን ቀልብ ሰውትተኔሃ ኢ ሰዎልድማን ፈረዴኖሁ ሚሃት?

30 ህትን እን መገኑ ገለትጨን እቾምጎሬ ህከ መገኒሃ ገለት ኣሳም ጠዋን ዎቐሽተ አኤኖኤሁ ሚሃት?

31 ቴሱ እቴንተጎሬ አገነተጎሬ መሃ አቴንተጎሬ ጉዕመንከ መገን ኬዕምኚሃ አዕዬ።

32 አይሁደ እኮ፡ አይሁደ እኮበእ እኮ፡ አመናኖ ጭምት ምኒ እኮ፡ አዬሁ ቆዕለኖገ አቶኖቹ።

33 እን ጉዕሙንኩሰ ጡምቶተ ዎሎ መን ጥቅም ቤሉ ገይኤ ጥቅም ሀሱዕነ መነ ጉዕመንከ አኣም ጠዋን ጉዕማንን መንዲሲሳምገን አዕኑሁ ህትን አዕዬ።

11

1 እን መሲህ አጉዳምገን አዕኑሁ ኤሳሃ አጉጁ።

ዱእ አኤኖ ወክት አኤ ሀሰሰኖ ጠዊተኔሃ

2 ጉዕመ ወክት ቃጌነንተኤቤቺሃለከ ክዕኔሃ ኣሴም ትምርተ ጠረኝቴን አፌነንተቤቺሃ ገለትጫንክዕኔ።

3 ጠዉ እኮጎሬ ጎንቻ ቡዕሉ መሲህ እሁሲ፥ መንቻ ቡዕሉ ምንሴ እነ እሁሰለከ መሲህ ቡዕሉ መገኑ እሁሰ አጥራመቱን ደጎኖተ ኢታም።

4 ህትን ጉንጉዕል ዱኣ አአኖሁ ህከረንገ ራገ ጠወአኖሁ ጎንቻ አዱሁ ገይሰ ቡዕሉ እኮ መሲህ ሙልሰኖ።

5 ህትን ሻሽ ጣጡዕናን ዱኣ አታኢሁ ህከረንገ ራገ ጠወአ መንቹት ህቲንሴ ገይሴ ቡዕሉ እኮ ምንሴ መንቹ ሙልሳኣ፤ ሁኩንን ሙምሴ ሜደገ ዋለአመኖ።

6 መንቹት ሻሽ ጣጥባች ሙምሴ ሙርሲሱን፤ ጠዉ እኮጎሬ ሙምሴ ሙርሲሱ ህከረንገ ሜዱ ሙልሰኖሴሃ እኮጎሬ ሻሽ ጣጡን።

7 ህትን ጎኑ መገን ደነለከ መገን ኬዕምኝ እኮቤቹሃ ጉንጉዕሉ ሀሰሰኖሰበኣ፤ ጠዉ እኮጎሬ ሜንቱ ጎኒሃ ኬዕምኝሃን።

8 መሰንትሰ ሜንቱ ጎኒች ደገንቶ ቤሉ ጎኑ ሜንቲች ደገሞበኣ።

9 ህትን ሜንቱ ጎኒሃ ከለቀንቶ ቤሉ ጎኑ ሜንቲሃ ከለቀሞበኣ።

10 ህከን መሳንለከ መገን መላይከት ለአሴቤቹሃ መንቹት ምንሴ እነ ሹምነት ኣዜን እሁሴ ለሊሶተ ቡዕሉ ጣጡን።

11 ጠዉ እኮጎሬ ቀርቻቤቻን ሜንቱ ጎኑ ዮበኢሃለከ ጎኑ ሜንቱ ዮበኢሃ ሄኦተ አታለኖበኣ።

12 መሰንትሰ ሜንቱ ጎኒች ከለቀንቶገን ጎኑ እለመኖሁ ሜንቲችት፤ ህትን ጉዕሙርቹንኩ ደገመኖሁ መገኒችት።

13 ህንዴ ገዉክዕኔ ፈረጄ፤ መት መንቹት ሻሽ ጣጡዕነ ዱኣ አኡ ጡመሃንዶ?

14 ጎኑ ሙምሰ ቅራርሰ ነሴጎሬ ሁኩን እሲሃ ሙልሰኖሃ እሁሰ ክልቀቲች ተማርቲነንተበኣንዶ?

15 ጠዉ እኮጎሬ ሙሙ ኣሰሞሴሁ ቡዕሉ ጣጦተ እኮቤቹሃ ሙምሴ ነሰቶጎር እሴሃ ኬዕምኝያን።

16 ህካን እኮቤቹሃ አዱሁ ኦደሞተ ሆሽ ጎሬ ኔሳሃ እኮ መገኑ አመዕኔ መኒሃ ከኒች አደ እኮ ጠዉ ዮኔበኣ።

መጨረሻ ጠሊላ ሁርባት ሴረ

(ማቶ. 26፥26-29፤ ማር. 14፥22-25፤ ሉቃ. 22፥14-20)

17 አዕኑ ጭምይቲነንተ ወክት ምዕረኖህዕኔ ቤሉ ደግለላኖህዕኔርቹ አቲነንተበኣቤቹሃ ከኒች ዋርን ዮ ትዛዝ ኣሳንክዕኔ ወክት እን ክዕኔተ ገለትጭህበኣ።

18 መስንትሰ ጉዕመርቹችን ሄጭ መገኑ አመዕኔ መንቤቸን ጭምይቲነት ወክት በላንከክዕኔ አደደመት ሄኡስ ሞጮጭዮም፤ ህከን ጠዊች ደሩስ ሀንቅ እሁስ አመዕናም።

19 ህከን እኮቤቹሃ ሀንቅ መኑ አዩኤታገሬ መለዕለንት ለልቶት በላንከክዕኔ አደደመት ሄኡስ ግደሃን።

20 አዕኑ ሜጡብ ጭምይቲነት ወክት እቲነንታሁ ጠሊለ ቀርች ሁርባትሃበኢ።

21 መስንትሰ እቲነንታ ወክት መቱ-መቱስ አገሩዕነ ሄጫቀንሺን ገይሰ ሁርባት እተኖቤቹሃ መቱስ ጎራዩገን ፈቀኖ፤ ህትን ዎሉስ ሰከረኖ።

22 እቶኖተለከ አጎኖተ ምኑ ዮህዕኔበእንደ? ህከረንገ መገኑ አመዕኔ ጭምት ዱእ ምኒ ህንቄነንንደ? ህትን መቱርቹሁ ዮሰበኢ መነ መሉልሴነንንደ? ቲሱ አን ክዕኔተ መ ዩ! ከን ጠውተኔሃ ገለትጮህዕኔንደ? ሆሮ ገለትጫንክዕኔበኢ።

23 ቀርቹች ቶጎሚሁለከ ክዕኔንከ ኣሴም ትምርቱ ከኒች ዎሮን ዮእሃን፤ ህግሴን ኣሴመ ሀንከዕርተ ቀርቹ ኢስ ዳቡተ ኬሽ

24 መገኑ ገለትጭ ቢጭ «[ህዕዬ እቹ] ኩን ክዕኔተኔሃ ኣሰሞ ጅሰማኤ፤ ካን ኤሳሃ ቃጎኖተ አዕዬ» ዩእ።

25 ህትን ሁርባቲች ኤተሮን ጠበቲሃ ኬሽ «ኩ ጠበቲሁ ቄጊንከኤ እሀኖ ሃዕሮሃ ወኣድ፤ ህከን እጌነንታ ወክት ጉዕመንከ ካን ኤሳሃ ቃጎኖተ አዕዬ» ዩሰ።

26 መስንትሰ ከ ዳቡተ እቲነንታ ወክትሃ ከ ጠበቲሃ እጌነንታ ወክት ጉዕመንከ ቀርቹ ኢስ ፈንቀል አሜቶተ ኢለ ሬሁስ ዱዱብሰቲነንተ።

27 እዪሁ ኣጉዕናንሰ ቀርች ሁርባቲሃ ኬዕምኝ ኣሉዕነ እቸገሬለከ ቀርች ጠበቲሃ አጎገሬ ቀርች ጅሰሚሃለከ ቄጊሃ ኤዳሙ እሀኖ።

28 ህከን እኮቤቹሃ መቱ መንቹ ህከን ዳቦች እቶት ብርተለከ ህከን ጠበቲሃ አጎተ ብርተ ገጧስ መረመሩን።

29 ሀኩ መንቹሁ ቀርች ጅሰመ መሃገሬ አደ አዕይ ደጉዕነ እተኖሁለከ ቀርች ጠበቲሃ አገኖሁ ጉዕመንኩ ፍርደ ገይሰ አሌን ኤበኖ።

30 ክዕኔ በሊች ልግቡ ሆጎኢሁለከ ጥዞኢሁ ህከኒሃት፤ ህትን ልግቡስ ሬቶኢሁ ህከን መሳኒት።

31 ገይኔተኔሃ አጥራመንት ደንጎም እቃን አሌንከኔ ፈረደመኖበኢ እቅ።

32 ጠዉ እኮጎሬ ከን ኣዱንያ አል መኒን ሜጡብ ኒ አሌን ፈረደመኖኔበእገ ቀርቹ ኒ አሌን ፈረደኖኔሁ ኔሳሃ ተማርሶኔታት።

33 ህካን እኮቤቹሃ አመኤ ኦሶ! ቀርቹ ጠሊሊ ሁርባት እቶኖተ ጭምይቲንተ ወክት ገገዉክዕኔ አገዕራቀሜ።

34 ጭምይቲንታሁ ፍርዲሃ እሀኖበእገ ጎራዬኢሁ ዮ ጎሬ ምኔንከሰ እቱን፤ ፈቆ ጠውተኔሃ አኡ ሀሰሰኖህዕኔሃ አሜቸም ወክት ኩላንክዕኔ።

12

ጠሊሊ አያን ኣሰቱተ

1 አመኤ ኦሶ! ጠሊሊ አያን ኣሰቶተኔሃ ደጎኖተ ሀሳም።

2 ሀንቅ መገኑ ደጎኑዕናን ሄኤንተ ወክት ደጌነቡ ጠወ አዋንቲን ጠወኢሃ አታልትበ ሽርኬቤቹ መርቲንተገ ደጌነተ።

3 ህካን እኮቤቹሃ ቲሱ አዪሁ መገን አያን ዋልቃን ጠወኡን «ኢሰ ቦሮረምኣሃን» ዮኖሁ ሆሮን ዮበእገለከ ጠሊሊ አያን ዋልቃን እህባች «ኢሰ ቀርቹሃን!» ዮተ ሜጡሁ አታልበገ አጥራመቲን ደጎኖተ ሀሳም።

4 አደዱ ጠሊሊ አያን ኣሰቱት ዮኡ፤ እኮጎሬ ጠሊሉ አያኑ ሚጥቹሃን።

5 ህትን አደዱ ክድመት ዮኡ፤ እኮጎሬ ቀርቹ ሚጥቹሃን።

6 ህትን ሆጉተ አኤኖ አደዱ ዋቆሁ ዮኡ፤ ጠወ እኮጎሬ ህካን ጉዕመንከ ጉዕመ መን አዲን አእኖሁ መቱሃ መገኑ።

7 መት-መቲሃሰ ጠሊሉ አያኑ መቱርቹ ለሊሰኖሁ ጉዕመንከ ደግለላኖ ጠዊሃት።

8 ጠሊሉ አያኑ መቶ መንቹሃ ሀይማን ጠወኡኖ ላገተ ኣሰኖሰ፤ ሁኩ ጠሊሉ አያኑንኩ ዋሊሀሰ ኤንኬዕኒን ጠወኡ ኣሰኖሰ።

9 ህትን ሁኩ ጠሊሉ አያኑ መቲሀሰ አመዕነቱ ዋሊሀሰንገ ጥዘናው ፈይሱ አታላኖ ኣሰቱተ ኣሰኖ፤

10 ህትን መቲሀሰ አጀብሰሰኖ ጠወ አኡ ዋሊሀሰንገ ራግ ላገተ ጠወኡ ህትን መቲሃ ሀንቅለከ ክዝብ አያን አደ አኤን ደጌኖ ኤንኬዕኑ ዋሊሀሰንገ ሮሰሞበእ አፊን ጠወኡ ህትን መቲሀሰንገ አደደ አፊን ጠወኤማህ ፈሰሬኖ ኣሰቱተ ኣሰኖሰ።

11 ጠወ እኮጎሬ ህከ ጉዕመ ጠወንከ ሁኩ ሜጡ ጠሊሉ አያኑ ሃሽዕዮገ ኣነኒንከሰ ቤክ ኣሰኖ።

መቶ መንቹ ጅሰማን ልገቡ ብሊቱ ሄኡሰ

12 ሚናቸው ጅሰማን ልግቡ ብሊቱ ሄኦኖህንገን መሃ ልግብ እኮጎሬ ጉዕሙንኩ ብሊቱ መቱ ጅሰመ እኮህንገን መሲህ ህትኒት።

13 መስንትስ አይሁደ እንኮምጎሬሁ ግሪክ አፎን ጠወዕናም መነ እንኮምጎሬሁ ሮስ እንኮምጎሬሁ ሰዋልድ እንኮምጎሬሁ ነኡ ጉዕሙንኩኔ ሜጡ ጅሰማ እንኮተ መቶ ጠሊለ አያኒን ጠመቀም፤ ህትን ጉዕሙንኩኔ ህከን መቶ ጠሊለ አያኒኝ እንጎም።

14 ጅሰሙ መኬኢሁ ልግቤ ብሊቲቸት ቤሉ መቶሃ ብሊቲቸበአ።

15 ህካን እኮቤቺሃ ሎከት «አን አንገተ እህበቤቺሃ ጅሰሚሃ ብሊትሃበአ» ይቶጎሬ ህካን ይንከሴ ጅሰሚኝ መቱ ብሊት እሁ ፈቃእንድ?

16 መጨት «አን እልተ እህበቤቺሃ ጅሰሚሃ ብሊትሃበአ» ይቶጎሬ ህካን ይንከሴ ጅሰሚኝ መቱ ብሊት እሁ ፈቃእንድ?

17 ህካን እኮቤቺሃ ጅሰሙ ጉዕሙንኩ ጠለዕል እልተ እኮ እቃን ሞጮጬ ሀከኔ ሄኦኖ እቅ? ህትን ጅሰሙ ጉዕሙንኩ መጨተ እኮ እቃን ሀንሱሱ ሀከኔ ሄኦኖ እቅ?

18 ጠዉ እኮጎሬ መገኑ ኢቱ ሃሊን ብሊት ጉዕመንከ ጅሰማን ሀሲሰኖ ቤቸን ሄኦኖገ አዕዮ።

19 ህትን ጉዕሙንኩስ ጠለዕል መቱ ብሊት እኮ እቃን ጅሰሙ ሀከኔ ሄኦኖ እቅ?

20 ቴሱ ልግቡ ብሊቱ ሄዕዮ ጎሬሁ ጅሰሙ ሜጦሃን።

21 ህካን እኮቤቺሃ እልት አንገተ «ሀሳንኬበአ» ይቶተ አታልታበአ፤ ቡዕሉንኩ ሎከተ «ሀሳንኬበአ» ዮተ አታለኖበአ።

22 ጠዉ እኮጎሬ ጅሰማን ላፈ አጉደኖ ብሊቱ አበ ሀሲሰኖሃን።

23 ህትን አሊንከኔ ኬዕምኙስ ቀቅቹ አጉደኖኔ ብሊቲሃ ሎረ ኬዕምኝ አሰናንሰ፤ ህትን ለኤንበገ ሙልናም ብሊቲሃ ሎረ ኬዕምኚን አገርናንሰ፤

24 ብሬን እክ ለለኖ ጅሰሚሃ ጉዕሚንከ ኩን ጉዕሙንኩ ሀሲሰኖስበአ፤ እኮጎሬ መገኑ ለኢሃ ሙልሰኖ አጉጅ ለለኖ ጅሰም ብሊት ሎረ ኬዕምኚን አፌኖሰገ አዕይ ጅሰመ ጉዕመንከ ሜጡ አዕይ አጻቀንሴስ።

25 ካን አዕዮሁ ጅሰመ ጉዕመንከ በላንከስ አደደመት ሄኦበእገ ገገዉንኩስ መቱ መቲንከስ አጻቀንታጋት።

26 ህካን እኮቤቺሃ ብሊቲች መቼስ ኦርጨመኖ ወክት ጉዕሙንኩ ብሊቲ ሜጡበ ኦርጨቀመኖ፤ ህትን መቼ ብሊቲ ኬዕምኛሙ እሀኖ ወክት ጉዕሙንኩ ብሊቲ ሜጡበ ሙንደእኖ።

27 ቲሱ አዕኑ መሲህሃ ጅስመ፤ መት-መቼክዕኔ ህከን ጅስምሃ ብሊቲ።

28 ህካን እኮቤቺሃ መገኑ መት-መቼ መነ መገኑ አመዕኔ መን ጭምት ዱእ ሞናን አደደ ሆጎን ሄአገ አዕዮ፤ ከን ሃሌን ዋዕናሃ አሳበተ ለንኪሃ ነብያኑት ሰቂሃ አስተማረተ ህከኒች ኤተሮን አጀብሲሰኖ ጠወ አታ መነ ህከኒች ኤተሮን ጥዘናመተ ፈይሳ መነ ህከኒች ኤተሮን መኒሃ ደግለልታ መነ ህከኒች ኤተሮን ገሻኑተ ህከኒች ኤተሮን ርስሞበእ አፌን ጠወአ መነ አመዕናኖ አዜን ኡርሾኡ።

29 እስ ጉዕሙንኩስ አሳበተንደ? ህትን ጉዕሙንኩስ ነብያተንደ? ህትን ጉዕሙንኩስ አስተማረተንደ? ህትን ጉዕሙንኩስ አጀብሲሰኖ ጠወ አታአረንደ?

30 ህትን ጉዕሚንከስ ጥዘናመተ ፈይሳ አስቱት ዮሰረንደ? ህትን ጉዕሙንኩስ ርስሞበእ አፌን ጠወአአረንደ? አደደ አፌን ጠወኤማሃ ጉዕሙንኩስ ፈሰርቶት አታልታአረንደ?

31 ጠው እኮጎሬ አዕኑ ጉዕሚችን በተኣ አስቱተ ደእቶኖተ ጠረኝቲን አጸሜ።

ህትን እን ጉዕሚችን ቆሀኖ ዋቃሃ ለሊሳንክዕኔ።

13

ሀንቅ ኢተተኔሃ

1 መንለከ መላይከ አፌን ጠወዕዮም እቃ ኢተት ሄእበኤች ወደኖ ብረትገለከ ዶልገ እኮም።

2 ህካን እኮቤቺሃ ራገ ጠወአም ዋልቀት ሄኦኤ እቃ፡ ሞሰጥር ጉዕመንከ ደጎም እቃን፡ ኤንኬዕኑ ጉዕመንኩ ሄዕዮኤ እቃ፡ ቆተት ቤቺችሴ ኬእ ዋሉቤቺ መርታገ አኣም አመዕነቱ ሄዕዮኤ እቃ ኢተት ሄእበኤች አን ተሰሃን።

3 ህትን ዮኤሃ ጉዕመንከ ቡጥቻኖተ ቤኮም እቃ፡ ጅስመኤ ጊራን ቡቦተ * ህግሽ አሰዮም እቃ ኢተት ሄእበኤች መቼርቺሃ ደግለለኖኤበእ።

12:28 ኤፌ. 4፡11። 13:2 ማቶ. 17፡20፤ 21፡21፤ ማር. 11፡23። * 13:3 ጊራን ቡቦተ፡- የኖሁ መት-መቼ ሉህ ክታበት «ቦኒሃ» ይታሉ።

4 ኢተት አታዕልሲሳእተ፤ ኢተት ጡመ ጠወ አታኢ፤ ኢተት ምቀኝታበኢ፤ ኢተት ዮሴህኔን ድከኣበኢ፤ ኢተት ቦንሲሳበኢ።

5 ኢተት አለ ቅልበ እካበኢ፤ ኢተት ጠለዕል ገይህሴ ይታበኢ፤ ኢተት ኡሙዕሪታበኢ፤ ኢተት ዮስ መንቹ በደለሞ እቃን ብድልገ ዋለኣበኢ።

6 ኢተት ሀንቅ ጠዋን ሙንደኣ ቤሉ ሂላ ጠዋን ሙንደኣበኢ።

7 ኢተት ጉዕመ ጠወ አታዕልታኢ፤ ኢተት ጉዕመርቹንከ አመዕንታኢ፤ ኢተት ጉዕመርቹንከ ተብሴን አገዕርታኢ፤ ኢተት ጉዕመ ጠዋን ጠረኝት ሄኣኢ።

8 ኢተት ሆሮ በኣበኢ፤ ራጉ እኮ እቃ ህገኖ፤ ርሰሞበኢ አፎን ጠወኡ እኮ እቃ ፈቀኖ፤ ኤንኬዕኑ እኮ እቃ ህገኖ።

9 መሰንትሰ ነኡ ደንጋሚሁ ዊመ ዊሚንትበኢ፤ ራገ ጠወዕናሚንኩ ዊመ ዊሚንትበኢ።

10 ጠወ እኮጎሬ ዊመ እኮ ጠወ አሜሾ ወክት ደሩ እኮ ጠወ ህገኖ።

11 ጩል እክ ሄዕዮም ወክት ጩለገን ጠወኣም፥ ሰውያምለክ አጥራመታም እቅ፤ ቴሱ ኦሰመኤ ሹሎም ወክት ጩል እክ ሄዕዮም ወክት አኣም ጠወ ጉዕመንከ አጉሮም።

12 መሰንትሰ ቴሱ ለአቃንቺን ለኤኖሀንገ ቀቅቹንከ ለዕናም፤ ጠወ እኮጎሬ ህከ ወክት ዊመ ዊሚን ለዕናም፤ ቴሱ አን ደጋሚሁ ደሩሲት፤ ጠወ እኮጎሬ ህከ ወክት መገኑ ኤሳሃ ደጎኤ ጌሰንከ ዊሙ ኤንኬዕኑ ሄኣኖ።

13 ህካን እኮቤቺሃ አመዕነቱ፥ ኢተትለከ ተብሶሁ ኩ ሰሱንኩ ጠረኝት ሄኣኢ፤ ጠወ እኮጎሬ ኢተት ህከኑኡቾ በተኣኢ።

14

ርሰሞበኢ አፊን ጠወእ ኣሰቱተ

1 ቴሱ ኢተተ አወኚ፤ ህትን ጠሊላ አያን ኣሰቱተ ጡመገ ሀሼ፤ በትሴን ራገ ጠወኣሃ አታሌኖ ኣሰቱተ ሀሼ።

2 መሰንትሰ ርሰሞበኢ አፊን ጠወኣኖ መንቹ መገኒሃት ቤሉ መኒሃ ጠወኣኖበኢ፤ እሰን ጠሊላ አያኒን ማጠሞ ጠወ ጠወኣኖቤቺሃ ጠወኣኖሰርቹ ደገኖሁ አዪሁ ዮበኢ።

3 ጠወ እኮጎሬ ራገ ጠወኣኖ መንቹ ዋሉ መነ ጠረኝሲሃ፥ ሸዚሃለክ ሰብር አእኖገ መኒሃ ጠወኣኖ።

4 ህካን እኮቤቺሃ ርሰሞበኢ አፊን ጠወኣኖ መንቹ ገዉሰ ጠረኝሰኖ፤ ጠወ እኮጎሬ ራገኖ መንቹ ዱእ ምነተ ጠረኝሰኖ።

5 ህትን ጉዕሙንኩክዕኔ ርሰሞበእ አፎን ጠወኤንታ እቃን ኢታሞ እቅ፤ እኩጎሬ በትሽ ሀሳሚሁ ራጎኖታት፤ መሰንትሰ ዱእ ሞነት ደግለሸቀንቶተ ጠወዕዮሃ ሂር ኩለኖሁ ዮበእ ጎሬ ርሰሞበእ አፎን ጠወአኖሀኒቶ ራጎኖሁ በተአኖ።

6 ቴሱ አመኤ ኦሶ! ክዕኔቤቹ አሜቸሞ ወክት ርሰሞበእ አፎን ጠወአን አሜቸሞ ጎር ክዕኔሃ መ ደገለለኖ? ህከን ወጥ ደግለለኖህዕኔ መገን ሞሰጥር ለሊሱ፥ ኤንኬዕኑ፥ ራገ ጠወኡለከ ትሞርት አፍ አሜቸሚሁ ቆህኖ።

7 ዋሉ ፈቅ ሁሉሊገ ክራርጋ ሩሁ ዮሰበእ ኦዳታ እኮ እቃ ላገሰ አደ እክ ለልትባች ሁሉሊ ላገተ እሁሰለከ ክራር ላገተ እሁሰ ማን ደገኖ?

8 ህትን ሞጮጨንቶበእ ላጋን ደገሞበእ ሃሊን ጡሩምበ ቡሴመጎሬ መርቺሃ ቡሴመገ መኑ ህት አዕይ ደጎተ አታለኖ።

9 ህከንገን ርሰሞበእ አፎን መኒሃ ኣግበገ ጠወኤንተጎሬ ቦብሪሃ ጠወኤንተህንገ እኬንተ ቤሉ ጠወኤንተርቹ አይ አጥራመቶ ደጎተ አታለኖ?

10 ከን ኣዱንያ አሊን አደዱ ልግቡ አፎሁ ዮኡ፤ ጠወ እኩጎሬ ፍሳረት ዮበእ አፎሁ ዮበእ።

11 ቴሱ መቼ መንቹ ጠወአኖ አፎ ፍሳረተ ደግባች አን ጠወአኖሀኒሃ ኮህቹ አሃሞ፤ እሰን ኤሳሃ ኮህቹ እህኖ።

12 ህካን እኮቤቺሃ ጠሊለ አያን ኣሰቱተ ሀሴንተጎሬ እኬንተጎሬ መገኑ አመዕኔ መነ ጠረኝሲሃ አታልቲነንተ ኣሰቱተ በትሴን ሀሼ።

13 ህካን እኮቤቺሃ ርሰሞበእ አፎን ጠወአኖ መንቹ ጠወአኖሰርቹ ፈሰሮተ አታለኖ ዋልቀተ ደኦተ ዱኣ እኡን።

14 መሰንትሰ ርሰሞበእ አፎን ዱኣ አዕዮ ጎሬ አያኒን ዱኣ አአኖ፤ ጠወ እኩጎሬ ቡዕሉኤ መቲርቹሃ ሆጉተ አዕዮበእ።

15 ቴሱ እኡ ሀሰሰኖኤርቹ መርቹሃን? አያኒንከኤ ዱኣ አአን ሰውቲንከኤ ዱኣ አአሞ፤ ህትን ቀልቢንከኤ ዘመረን ሰውቲንከኤ ዘመራሞ።

16 ህካን እህባች እት አያኒንከክ ርሰሞበእ አፎን መገኑ ገለትጭቶንትጎሬ መቲ ኮህቹ መንቹ ይቶንትርቹ ደግበቤቺሃ እት መገኑ ገለትጭቶንትሀኒሃ ህት እክ «አሚዕን» ዮኖ?

17 መሰንትሰ እት መገኑ ገለትጭቶንትጉ ጡመሃ እቅ፤ እኩጎሬ ሁኩን ዋሉ መንቹ ጠረኝሰኖበእ።

18 ጉዕሚቶክዕኔን ሎረ ርሰሞበእ አፎን ጠወአሞቤቺሃ መገኑ ገለትጫሞ።

19 ጠወ እኩጎሬ ርሰሞበእ አፎን ቶኑ ኩሜ ላገተ ጠወኢቶ ዋሉ መነ ተማርሲሃ ርሰሞ አፎን መገኑ አመዕኔ ጭምት ዱኣ ሞናን ኦንት ላገተ ደገኖ ላጋን ጠወኡ ኢታሞ።

20 አመኤ ኦሶ! ሂላ ጠዋሃ ጨለተ እኬ ቤሉ ሰውቲንከክዕኔ ጨለተ እኮኖቹ፤ ጠዉ እኮጎሬ ሰውቲንከክዕኔ እንጀ አጉዕምቲንታእረ እኬ።

21 ሕጋን፡-

« ርሰሞበእ አፎን ጠወእ መረሃለከ
 ዋሎ ባድ መን አፎን ከን መረሃ ጠወእንሰ፤
 ጠወዕዮምጎሬሁ ሞጮጭታኤበእ ይዮኡ ቀርቹ መገኑ»
 የመም ከተበሞኡ።

22 ቲሱ ርሰሞበእ አፎን ጠወኡ መላተ እህኖሁ አመዕንበ መረሃት ቤሉ አመዕኔ መረሃበእ፤ ጠዉ እኮጎሬ ራገ ጠወኡ አመዕኖታት ቤሉ አመዕንቡ መረሃትበእ።

23 አመዕኖኑት ጉዕሙንኩ ጭምይታ ወክት ጉዕሙንኩ ርሰሞበእ አፎን ጠወእን ደግቡ ህከረንገ አመዕንቡ መኑ አጎጎሬ «ኩ መኑ በርገጎኡ» የኖበእንደ?

24 ጠዉ እኮጎሬ ጉዕሙንኩሰ ራገ ጠወእን ደግቡ ህከረንገ አመዕንቡ መንቹ አጎጎሬ ሞጮጮ ላገት ሆርንት ዎቀሳሰ፤ ህትን ሞጮጮ ላጋት ሆርንትሰ ፈረዳሰ።

25 ቀልቤንከሰ ቲለሞ ጠዉ ለለኖ፤ ህካን እኮቤቹሃ ሁኩ መንቹ ኡላን ኡብ «ሀንቅንከ መገኑ ክዕኔ በላን ዮኡ» የን መገረሃ ሰገደኖ።

ዱእ እኤኖ ወክት ሄኡ ሀሰሰኖ ሴርተኔሃ

26 አመኤ ኦሶ! ቲሱ መ ይናም? አዕኑ ጭምይቲንተ ወክት መት-መቲሃሰ መዝሙሩ ዮሲሁ ዮኡ፤ ዋሉሰ ተማርሰኖ፤ መቱሰ ማጠሞርቹ ለሊሽ ኩለኖ፤ መቱሰ ርሰሞበእ አፎን ጠወእኖ፤ መቱሰ ርሰሞበእ አፎን ጠወኤማሃ ፈሰረኖሁ ዮኡ፤ እኮጎሬ ሁኩ ጉዕሙንኩ አመዕኖኑት ጠረኝሲሃ እሁን።

27 ህትን ርሰሞበእ አፎን ጠወእኖሁ ሄዕዮ ጎሬ ለሙ ህከረንገ በተዕዮ ጎሬ ሰሱ እክ ተሪን ተሪን ጠወኡን፤ እሰ ጠወእእንከ ዋሉ መኑ ፈሰሩን።

28 ጠዉ እኮጎሬ ፈሰሩ አታለኖ መንቹ ሄእባች መገኑ አመዕኔ ጭምት ምናን ርሰሞበእ አፎን ጠወኡንከ፤ ህከን ወጥ ገይሃሰለከ መገረሃ ጠወኡን።

29 ራገ ጠወእኦሩ ለሙ ህከረንገ ሰሱ እክ ጠወኡን፤ ዋሉ መኑ ጠወእሞሰ ጠወ አጥራመት አደ ኦት ደጉን።

30 ጠዉ እኮጎሬ አፋዕሌ መረኝ መቲሀሰ ሃሽኦቱት ለልቶሰጎሬ ዎዕናሃ ጠወእኖሁ ጨለኖን።

31 መኑ ጉዕሙንኩ ተማርተለከ ጠረኞት ጉዕሙንኩክዕኔ ተሪን ተሪን ራገ ጠወእኖተ አታልቲንተ።

- 32 ህትን ነብያካ እያኑ ነብያካተ አዘዘመኛ።
 33 መሰንትሰ መገኑ ወገሬትየ መገኑ ቤሉ ጨንጨነሃ መገኑበአ።
 34 ሚንቱ መገኑ አመዕኔ መን ዱእ ምኒ አዜን ጠወኡንከ፤
 መሰንትሰ ሕጉ የኖገን እሰ አዘዘንቶታት ቤሉ ጠወኢሃ
 ፈቀደሞሰበአ።
 35 ህካን እኮቤቹሃ መት መንቹት መገኑ አመዕኔ መን ዱእ ምናን
 ጠወኡ ሙልሰኖሃ እኮቤቹሃ ሚንቱ ደጎተ ሀሳ ጠወ ሄዕዮ ጎሬ
 ምንሰ አነ ምኔሰ ጠዕምቱን።
 36 ህትን መገን ላገት አሜቶኢሁ ክዕኔቹትንዶ? ህከረንገ መገን
 ላገት እልቶኢሁ ጠለዕል ክዕኔቤቹሃትንዶ?
 37 አዲሁ «አን ነብዬቹሃን» የኖሁ ህከረንገ «ኤሳሃ ጠሊሊ እያን
 አሰቱት ዮኤሃን» የኖሁ ሄዕዮ ጎሬ ኩ ከተቦንክዕኔሁ ቀርቻ ትዛዝ
 እሁሰ ደጉን።
 38 ጠወ እኮጎሬ ካን ሞጮጮምበአ የኖ መንቹ ዮ ጎሬ እሰ
 ጠወአኖሁ ሞጮጮሙንከ።
 39 ህካን እኮቤቹሃ አመኤ ኦሶ! ራገ ጠወኢሃ ጠረኝቴን ሀሼ፤
 ህትን ርሰሞበአ እፌን ጠወኡሃ ከንቶኖቹ።
 40 ጠወ እኮጎሬ ጉዕሙንኩ ጠወ ጡመ ሃሊንለከ ሴሪን እሁን።

15

መሲህ ሬሆች ኬእተኔሃ

- 1 አመኤ ኦሶ! አዕኑ አን ተማርሲየንክዕኔ እእቴን ጠረኝቴን
 ኡርቴንተ ተሸት ላገተ ቃግሶህዕኔተ ሀሳም።
 2 ህከ ተሸት ላገንተ ጠረኝሴን አፌንተጎሬ ህከን ላገ አዲን
 ፈቄነንተ፤ ህካን እህባች አመዕነቱክዕኔ ተሰሃን።
 3 ጉዕመርቺችን በትሸ ሀሰሰኖ ጠወ አንን ቶጎሚሃ ክዕኔኤ ህግሽ
 አሴም፤ ሁኩንን ጠሊሊ መጻፋን የመሞገን መሲህ ጩብኔተኔሃ
 ሬዮኡ።
 4 ሞገሞ፤ ጠሊሊ መጻፋን ከተበሞገን ሰቅ በር ሬሆች ኬዕዮ
 የኖሃን።
 5 እሰን ጴጥሮሴሃ ለሌእ፤ ህከኒች ኤተሮን ቶና ለሞንከ አሳባተ
 ለሌእ፤
 6 ህትን ኦንቴ ጥቤች በተኣ አመዕናኖተ መቼ ወክት ለሌእ፤
 እሳችን መቼ-መቼሰ ሬቶጎሬ ልግቡሰ ቴሁ ኢለ ፎሊን ዮኡ።

15:3 እሳ. 53፥5-12። 15:4 መዝ. 16፥8-10፤ ማቶ. 12፥40፤ ሱቀ. 2፥24-32።

15:5 ማቶ. 28፥16-17፤ ማር. 16፥14፤ ሉቃ. 24፥36፤ ያህ. 20፥19።

7 ህትን ኢስ ያቁቢሃ ለሌላ፤ ህከኒች ኤተሮን ጉዕማንከ አሳባተ ለሌላ።

8 መጨረሻን ጉዕሚችን ሆፈኣም ኤሳሃ ለሌላ።

9 መሰንትሰ መገን ዱእ ሞነተ ሸረን ኦሪሳሚሃ እኮምቤቺሃ እን አሳባች ጉዕሚችን ሆፈኣሚሁለከ ሶቀማንቹ የመም ገእሙ ገበእበኤሃን።

10 ጠዉ እኮጎሬ እን ቴሱ ሄኣም ሀለት ደኤሚሁ መገን አሰቶቹት፤ ህትን ሁኩ አሰንቶኤ አሰቱት ላልቹ ዮበኢሃ እኮበኣ፤ እንን ዋሎ መኒች ጉዕሚችን በትሽ ጠረኝ አዕዮም፤ ጠዉ እኮጎሬ አዕዮሁ ኢን ሄኣኖሃ መገንተ አሰቱ ቤሉ አኔበኣ።

11 አኒ እኮም እቃ እሳሁ ተማርሰናሚሁ ከኒት፤ አዕኑሁ አመዕንቴንታሁ ከኒት።

ሬዮ መኑ ሬሆች ኬእኖሃ እሁስ

12 ቴሱ መሲህ ሬሆች ኬኡስ ተማርሰናሚሃ እኮች ህት ክዕኔች መት-መቱ «ሬቶ መኑ ሬሆች ኬኣበኣ» ይታኢት?

13 ሬቶ መኑ ሬሆች ኬእባሃ እኮች መሲህ ሬሆች ኬዕዮበኣ ዩሃን።

14 ህትን መሲህ ሬሆች ኬእባች ኒ ትምርቱለከ ክዕኔ አመዕነቱሁ ተሰሃን።

15 ህከኒችን በትሽ «መገኑ መሲህ ሬሆች ኬሾሰ» ይን እሰተኔሃ መሰከርኖምቤቺሃ መገኒሃ ክዝብ ምሰክር እንኮም ዩሃን፤ ሬቶ መኑ ሬሆች ኬእባች መገኑ መሲሁ ሬሆች ኬሾሰበኣ ዩሃን።

16 መሰንትሰ ሬቶ መኑ ሬሆች ኬእባሃ እኮች መሲህ ሬሆች ኬዕዮበኣ ዩሃን።

17 ህትን መሲህ ሬሆች ኬእባች አመዕነቱክዕኔ ተሰሃን፤ አዕኑሁ ከበሬ ኢለ ጩቢንከክዕኔ ዮንተ ዩሃን።

18 መሲሂን አመዕንት ሬቶእሩ በኦኡ ዩሃን።

19 ነኡሁ መሲህ ተብሳሃ አዕናሚሁ ከን ዱንያ አሌን ሄዕናም ሄኢሃ ጠለዕል እኮጎሬ መኒች ጉዕሚችን በትሴን ሻዝንሳምረ እንኮም ዩሃን።

20 ጠዉ እኮጎሬ መሲህ ሬቶሁኡተ ዋዕኔሃ እክ ሀንቅንከ ሬሆች ኬዕዮኡ።

21 መሰንትሰ ሬሁት መቶሃ መንች አዲን አሜቶገን ሬቶእሩ ሬሆች ኬኡሁ መቶ መንች አዲኒት።

22 መኑ ጉዕሙንኩ ኣደም መሳን ሬሀናሀንገን መሲህ መሳን መኑ ጉዕሙንኩ ሄኡ ደኣኖ።

23 ጠዉ እኮሳሬ መት-መቱንኩ ገገይስ ተሪን አሜተኖ፤ መሲህ ሬሆች ኬአን ዋኔሃን፤ ህትን ኤተሮን መሲህ አሜቸ ወክት እሲሃ እኮእረ ሬሆች ኬሰኖ።

24 መሲህ ገሹ ጉዕመንከ፤ ደኝነቱ ጉዕመንከለከ ዋልቀተ ጉዕመንከ ቤሾች ኤተሮን ዋምነቱ አነ መገኒሃ ህግሽ አሰኖ ወክት ዘማን ጎፋ እሆኖ።

25 መገኑ ዲነስ ሎከስ ጫዕማች ዋሮን አኦተ ኢላ መሲህ ዋመ አሁ ሀሰሰኖስ።

26 መጨረሻን ቁለም በአኖሁ ዲኑ ሬሁታን።

27 «መገኑ ጉዕመ ጠወንከ ሹምነቲቶስ ዋሮን አዕዮኡ» የኖሁ ከተበሞኡ፤ ጠዉ እኮሳሬ «ጉዕሙ ጠወንኩ ሹምነቲቶስ ዋሮን እኮኡ» የኖ ወክት ጉዕሙ ጠወንኩ ሹምነቲቶ ዋሮን አዕዮ አነ መገኑ በርገኖበኡ።

28 ጉዕሙርቹንኩ መሲህ ሹምነቲ ኣዚን እኮች ኤተሮን አኑ መገኑ ጉዕሙርቹንኩ ጠገመኖሃ እሆተ ህከ ወክት ቤቱ ገወንኩስ ጠቀናገ አዕዮ መገኒሃ ጠገመኖስ።

29 ህካን እህባች ሬዮ መን ወጥ ጠመቀመኖ መኑ መ አአኖት? ህትን ሬዮ መኑ ሆሮን ሬሆች ኬአባሃ እኮሳሬ መኑ እስ ወጥ ጠመቀመኖሁ ሚሃት?

30 ነኡ ገወንኩኔ ጉዕመ ወክት አደገሃ ገውኔ ኣሰነን ሄዕናሚሁ ሚሃት?

31 አመኤ ኦሶ! ኤሳሃ በሬን በሬን ሬሁት ገንበ ይታኤት፤ አንን ህካን ያሚሁ ቀርቹሃኔ መሲህ ኢስ አዲን ክዕኔኤን ዮኤ አመዕነቲንት።

32 ህትን አን ኤፌሶን ከተማን አብል ቡሳዊን ኡጀቀሜኖህንገን ኡጀቀሞሚሁ መን ሰውቲን እኮሳሬ መ ደግለለኖኤ? ህትን ሬዮ መኑ ሬሆች ኬአባሃ እኮች «ጋቲተ ሬናምቤቹሃ አሜ አንቶለከ አንገ» ይታገ እሁሃስ።

33 አዕኑ ሉጨንቶኖቹ፤ «ሂሉ ጃሉ ጡመ አመል ቤሰኖ» የመሞኡ።

34 ቴሱ ቀልብ አዕዬ፤ ጨብ አኡ አጉሬ፤ መገኑ ደግቡ መኑ በላንከክዕኔ ዮኡ፤ አን ህካን ያሚሁ ሙልሶህዕኔተ ይደት።

ሬሆች ኬዕዮ መንች ጅስሙ መ አጉደኖ?

35 መቱ መንቹ «ሬቶ መኑ ኬኣኢሁ ሀት እኪት? ሬሆች ኬኣ ወክት ጅስሙስ መ አጉደኖ?» ይ ጠዕመኖ መንቹ ሄኦተ አታለኖ።

36 እት ኩ ገደ መንቹ! እት ወጣንት ወጠት ሸንትባች ሙታበኡ።
37 እት ወጣንት አለሰ ህከረንገ ዋሎርች ዜሬተህቤሉ ኤተሮን
ሙች ነጹኢሃበኡ።

38 ጠወ እኮጎሬ መገኑ ኢተኖ ሃሊን ገይሰ ደነ ኣሰኖሰ፤ ህትን መት-
መቲሃሰ ዘሬትሰ ገይሰ ደነንከ ኣሰኖሰ።

39 መሰንትሰ ማሉ ጉዕሙንኩ ሜጦሃ ደነበኡ፤ እኮጎሬ መን ማሉ
ሜጦሃ ደነ፤ ግዝ ማሉሁ ዋሉሃ ደነ፤ ህትን ጭኦ ማሉ አደደ ደነ፤
ቁርጩሜ ማሉ ዋሉሃ ደነ።

40 ህትን ሰሜ ጅሰሙ ዮኡ፤ ኡለ አል ጅሰሙሁ ዮኡ፤ እኮጎሬ ሰሜ
ጅሰሙ ኬዕምኙ መቶሃ ደነ፤ ህትን ኣዱንያ አል ጅሰሙ ኬዕምኙ
ዋሉሃ ደነ።

41 ህትን አር ኬዕምኙ መቶሃ ደነ፤ አገንች ኬዕምኙንገ ዋሉሃ
ደነ፤ ቤዜ ኬዕምኙሁ ዋሉሃ ደነ፤ መሰንትሰ መቶሃ ቤዜ ኬዕምኙ
ዋሊችሰ አደደ።

42 ሬዮ መኑ ሬሆች ኬአኖሁ ህትዪት፤ ወጠሞ ጅሰሙ በአኖሃን፤
ሬሆች ኬዕዮ ጅሰሙ በአበሃን።

43 ሁኩንን ሆፍኚን ወጠሞ ኬዕምኚን ኬአኖ፤ ህትን ላፈ እክ
ወጠሞ ጠረኝ እክ ኬአኖ።

44 ህትን ማል ጅሰሚን ወጠሞ ጠሊሉ አያኑ ሄኡ ኣሴ ጅሰመ
እክ ኬአኖ፤ ማል ጅሰሙ ሄኦች ጠሊሉ አያኑ ሄኡ ኣሴ ጅሰሙ ዮኡ።

45 ህካን እኮቤቺሃ «ዋኔ መንቹ አደም ሄአኖ ክልቀት እኮ» የመም
ከተበሞኡ፤ ኤተር አደም ሄኡ ኣሰኖ አያነ እኮ።

46 ጠወ እኮጎሬ ዋዕናሃ አሜቸሁ ጠሊላ አያኒን ሄኡ ኣሰሞሲሁ
እሁዕነ ማል ጅሰሙ አሜቸ፤ ጠሊላ አያኒን ሄኡ ኣሰሞሰ ማል
ጅሰሚች ኤተሮን አሜቸ።

47 ዋዕኔ መንቹ ከለቀሞሁ ኡለ ትቢች እኮቤቺሃ ኡላሃን፤ ለንክ
መንቹ አሜቸሁ ሰሜቺት።

48 ኡላች እኮአሩ ኡላች እኮሃ አጉዳእ፤ ሰሜች እኮአሩ ሰሜች
እኮኢሃ አጉዳእ።

49 ነኡ ኡላ ትቢች ከለቀሞ መንች ደነ አጉንደምገን መቼ በር
ሰሜች አሜቸ መንች ደነ አጉንደም።

50 አመኤ ኦሶ! መቼርቼ ኩላንክዕኔ፤ ማሉለክ ቄጉ መገን
ዋምነቱ ዋረሶተ አታልታበኡ፤ ህትን በአኖ ጅሰሙ በአቡ ጅሰመ
ዋረሶተ አታለኖበኡ።

51 ቲሱ መቼ ማጠሞ ጠወ ኩላንክዕኔ፤ ነኡ ጉዕሙንኩኔ
ሬናምበኡ፤ ጠወ እኮጎሬ ጉዕሙንኩኔ ዶረማም።

52 ደረማሚንኩ መጨረሻ ጡሩምበ ቡሴኖ ወክት እሌ ገለብትገ መቶ ወክቲኒት፤ ጡሩምቡ ቡሴመኖ፤ ሬቶ መኑ በእበ መነ እክ ኬኣእ፤ ነኡሁ ደረማም።

53 መሰንትሰ ኩ ሸመኖ ማሉ ሸምባሃ ኦደኡ ህትን ኩ ሬሀኖ ማሉ ሬህባሃ ኦደኡ ሀሰሰኖሰ።

54 ኩ በእኖ በእባሃ ኦደዕኖ ወክት ህትን ኩ ሬሀኖ ሬህባሃ ኦደኡ ወክት «ሬሁት ቄላንት በኦኡ» የመም ከተበሞሁ ዊመኖ።

55 ህትን
«ሬሆ! ቄሉክ ሀከበ ኖኡ?

ሬሆ! መነ ምዕርታንት ዋልቀክ ሀከበ ኖኡ?» የመሞኡ።

56 ሬሆ ቄል ዋልቀት ጩብሃን፤ ጩብ ዋልቀት ሕገሃን።

57 ጠዉ እኩጎሬ ቀርቼሃኔ መሲህ ኢሰ ኦዲን ቄሉ ኣሰኖኔ መገኒሃ ገለቱ እሁንሰ!

58 ህካን እኮቤቹሃ ኢተንቲንተ አመኤ ኦሶ! ጠረኝቲን ኡርዬ፤ ቀርቾ ኢሲሃ አቲንተ ሆጉት ጠለዕለ እክበገ ደጌነንተቤቹሃ ሌንቄቅቶኑዕናን ቀርቾ ኢሰ ሆጉት ጉዕመንከ ወክት አዕዬ።

16

ዬሩሳሌማን ሄኣ አመዕናኖተ ሀዕሌኖ ብረ ጭም አኤመገ

1 አመዕናኖተ ሀዕላቀሚኖ ብረ ጭምአእተኔሃ ገለትይ ባዶን ሄኣ አመዕናኖተ ኩሎምገን አዕኑሁ ህት አዕዬ።

2 ሁኩ ብረ ጭምአኤኖሁ አን አሜታም ወክት እሀኖበእገ መት-መቱክዕኔ ደአቲነንተሀኒች ዋልቀክዕኔ ጌሰ ጉዕመንከ ወክት ሳምንት ዋኔ በር አደ አቲን አፋሽዬ።

3 አን አሜቾም ወክት አዕኑ አመዕንቲነንተ መኑ ሀከ ጭም አቲንተ ብረ ዬሩሳሌመ መሰቶተ ደብደቤተ ከተብ ሜጡበ አዕይ ሶሃንሰ።

4 ኢ መሩ ሀሰሾ ጎሬ እሰ ኢን ሜጡበ መርታኦ።

ጳውሎሴ ያደተ

5 መቄዶን ባድ አዲን ሀጎተ ሰውዬምቤቹሃ ሀከኒን ሀገን ክዕኔተ ለኦተ አሜታም።

6 አን ሀከቤቹሃ መርም ጎር ዋቄሃእ እካ ሸንቅተ ኣቶኖኤተ ክዕኔቤቾን ቀዉ ጌሰ አፋዕላሚሃ እሀኖ፤ ህትን ከርም ክዕኔቤቾን አፋዕላሚሃ እሀኖ።

7 ህካን እኮቤቺሃ ህገኤ ዎቃን ለኦህዕኔተ ሀሳምበክ፤ መገኑ ዩጎር ክዕኔን ሜጡብ መቼ ጌሰ ዲንኮተ ተብሳሃ አኣም።

8 ጠዉ እኮጎሬ ጳንጠቆስጤ * ከበጀት ኢላ ኤፌሶን ከተማን ዲንካም።

9 መሰንትሰ ልግቡ ሆጉት ሄኦ አልባዕሉት ኡሩት ፈንተኦኤ፤ እኮጎሬ ኤሳሃ ግባኤ መኑ ልግብሃን።

10 ጥማቶስ አሜቸ ወክት ዋጁዕናን በላንከክዕኔ አፋዕለኖገ አዕዬስ፤ መሰንትሰ እሲሁ ኢገን ቀርቻ ሆጉተ አአኖሃን።

11 ህካን እኮቤቺሃ አዪሁ ህንቁንከሰ፤ እኮጎሬ አመዕናኖን ሜጡብ አገራምቤቺሃ ኢቤቹ ወገሬቲን ፈንቀሎተ ዎቄሀስ እካ ሸንቅተ ኦቲን ሀርሲሼሰ።

12 አመኔቤቹ አጽሎስ ዎሎ አመኦሶን ሜጡብ ክዕኔቤቹ መርተ አበ ኡጭዮንስ እቅ፤ እኮጎሬ እስ ቲሱ ክዕኔቤቹ አሜቶተ ሀሾበክ፤ መከናሰ ወክት ክዕኔቤቹ አሜተኖ።

ጎፍሜ ሸዘነተለክ ወገሬትሱ

13 በቅይዬ፤ አመዕነቶንከክዕኔ ጠረኝቲን ኡርዬ፤ አጳሜ፤ ጠረኝዬ።

14 ህትን አቲነንታሃ ጉዕመንከ ኢታን አዕዬ።

15 አመኤ ኦሶ! አካይ ባዶን ሄጭት መገኑ አመዕንቶአሩ እስጥፋኖሴ አበርስ እሁሰለከ እስ አመዕናኑተ ሀዕልቶተ ገወሰ ህግስ አቶገ ደጌነንተ።

16 እስገዮ መኒሃለከ እሳንን ሜጡብ አተን ሆጋ መኒሃ ጉዕሚንከ አዘዘንቲንተገ ጥሽ አዕይ ቃግሳንክዕኔ።

17 እስጥፋኖስ፥ ፈርዶናጢሰለከ አካይቆስ ኢቤቹ አሜቶቤቺሃ ተሽ ይዮኤ፤ አዕኑ ኢን ሜጡብ ደገንቲንበቤቺሃ እስ ክዕኔቤቹን ሆፈዕዮኤርቹ ዊንሸቶኤ።

18 እስ ኢላ ክዕኔ ቀልብ ፎሎሲሶአረ፤ ህካን እኮቤቺሃ ህትኔ መነ ደጉ ሀሰሰኖሀዕኔ።

19 እስይ ባዶን ሄኦ አመዕናኑተ «ወገሬት ዮንተንዶ?» ይታህዕኔት፤ ህትን አቂልለከ ጵርስቅል ምኔንከሰ ጭምይታ አመዕናኖን ሜጡብ ቀርቻ ሱዕሚን «ጠረኘገ ወገሬት ዮንተንዶ?» ይታህዕኔት።

* 16:8 ጳንጠቆስጤ፡- ዩ አይሁዳውያኑ አዘመረሰ ጭምአቶች ኤተሮን ኦንታይቅ በሬን ከበጄኖሃ ከበጀት። 16:8 ሊዌ 23፡15-21፤ ዘዲ. 16፡9-11። 16:9 ሶቀ. 19፡8-10። 16:10 1 ቆሮ. 4፡17። 16:15 1 ቆሮ. 1፡16። 16:19 ሶቀ. 18፡2።

20 ህትን አመዕናኑት ጉዕሙንኩ «ወገሬት ዮንተንዶ?»
ይቶህዕኔ፤ ገገዉንኩክዕኔ አመዕናኖተ ሀሰሰኖ ነጠ እኮ
ወገሬትጨቀሚን ዝያዕረቀሚ።

21 እን ጳዉሎስ ከ ወገሬት ገይእ አነጋን ከተቦንክዕኔ።

22 ቀርቼ መሲህ ኢስ ኢትባሁ ሄዕዮ ጎሬ ቦሮረሞኢሃ እሁን፤ ኒ
ቀርቾ አም!†

23 ቀርቾሃ ኢስ ኣሰቱት ክዕኔን ሜጡበ እኩን።

24 ኢ ኢተት መሲህ ኢስ አዲን ጉዕሚንከክዕኔን ሜጡበ እኩን!
አሚዕን።

† 16:22 ኒ ቀርቾ አም፡- የኖሁ ግሪክ እፎን «ማራናታ» የኖ።

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d